

# YO MOGOLWANE GO

## SALOMO O MO BJALE



A re feleng re eme feela nakwana, ge re bala Lentšu la Morena. Lena ba le ka ratago go phetla go palo ya Lengwalo, bošegong bjo, phetlang go Mateo 12, go thoma ka temana ya 38.

*Gomme fao, ka gona ba bangwe ba bamangwalo le ba Bafarisei ba arabile, ba re, Mong, re tla nyaka leswao go tšwa go wena.*

*Eupša o arabile gomme o rile go bona, Moloko wo mobe le wa bootswa o nyaka leswao; gomme go ka se be leswao le fiwago go ona, eupša leswao la moprofeta Jona:*

*Ka gore bjalo ka ge Jona a bile matsatši a mararo le mašego a mararo mpeng ya hlapikgolo; kafao Morwa wa motho o tla ba matsatši a mararo le mašego a mararo ka pelong ya lefase.*

*Banna ba Ninife ba tla tsoga ka kahlolong le moloko wo, gomme ba tla o ahlola: gobane ba sokologile ka thero ya Jona; gomme, bonang, yo mogolwane go feta Jona o fa.*

*Kgošigadi ya borwa e tla tsoga ka kahlolong le moloko wo, gomme o tla o ahlola: ka gore o tlile go tšwa dikarolong tša kgolekgole tša lefase go kwa bohlale bja Salomo; gomme, bonang, yo mogolwane go feta Salomo o fa.*

<sup>2</sup> A re inamišeng dihlogo tša rena. Ka dihlogo tša rena le dipelo di inamišitšwe ka Bogoneng bja Gagwe, a go ne kgopelo ka fa bošegong bjo, yeo o ka ratago go gopolwa ka thapelong? Ge go le bjalo, e no phagamiša diatla tša gago, gomme o laetše ka seo, “Modimo, ekwa kgopelo ya ka.” Bjale rapelang ka setu ge re sa ya thapelong.

<sup>3</sup> Tate wa rena wa Legodimong, re tšea wo mongwe wa menyetla ye megologolo kudu yeo re nago le yona ka thoko ye ya Letago, ke go kopana ka phuthegong ya batho ba ba dumelago go Wena, gore moo re ka letelago Bogona bja Gago, gobane ke go ya ka tshepišo ya Gago. O rile, “Moo go lego ba babedi goba ba bararo ba kgobokane Leineng la Ka, fao Ke gona magareng. Gomme ge ba ka kgona go dumelalana godimo ga selo se se itšego, le go kgopela, ba tla se amogela.” Morena, selo se segologolo seo re kago go dumelalana go sona, bošegong bjo, gore O tla no kopana le rena, gore re ke re bone Bogona bja Gago, re Bo kwe ka meoyeng ya rena, le go tseba gore O fa. Gomme

ka Bogoneng bja Gago, re ikwela gore re ka kgona go tšhollela dipelo tša rena ntle, ka kgopelo. Gomme ge re naganišiša godimo ga Gago, a nke re ikwele sekwi se segolo se sa karabo ya dithapelo tša rena, bjalo ka ge re kgopela bjale ka go la Jesu Kriste Leina. Amene.

Le ka dula.

<sup>4</sup> Ke nyaka go tšea thuto, Morena ge a rata, ka Mangwalo a mangwe ke a ngwadilego fa, bakeng sa feela dinakwana di se kae pele re eya go rapelela balwetši, godimo ga thuto ya: *Yo Mogolwane Go Salomō O Mo Bjale*.

<sup>5</sup> Re hwetša mo mathomong a rena a Lengwalo bošegong bjo, moo sehlogo sa rena se hwetšwago, gore Jesu o be a ngangišana le Bafarisei. O be a ba kgalema, gobane ga se ba Mo kwešiša. Monna, yoo baithutamodimo ba bego ba hlahlilwe, ba lebeletše pele go nako ya go bonagala ga Gagwe, gomme ka gona, ge A fihla, ga se ba Mo kwešiša gomme ba Mmiditše, “diabolo.” Ba boletše gore bodiredi bjo A bilego le bjona e be e le bja diabolo, gobane O kgonne go hlatha dikgopolo tšeo di bego di le dipelong tša bona, gomme ka se ba Mo naganne go ba mohuta tsoko wa—wa ngakamoloi goba sengwe boka mmolelelamahlatse; gomme yo mongwe le yo mongwe o a tseba gore ke meoya ye mebe. Gomme ka gona, go bitša mošomo wa Modimo, “moya wo mobe,” e be e le maroga.

<sup>6</sup> Gomme O be a ba boditše gore O be a tla ba lebalela yona, gobane Moya wo Mokgethwa o be o se wa be wa tla gabjale go tla go lefatša dipelo tša bona le go—go ba dira ka lemong gore ba kwešiše Modimo. Ba be ba le dipelo di le kgole go tloga go Modimo. Tšohle ba di tsebilego e be e le thutamodimo ya go tonya ya molao, gomme ba be ba se ba be ba amogela Moya wo Mokgethwa. Eupša O rile, “Ge Moya wo Mokgethwa o tlile le go dira selo sa go swana, go bolela kgahlanong le Woo, ga e tsoge ya ke ya lebalelwa ka lefaseng le goba lefaseng le le tlogo.”

<sup>7</sup> Gomme ke be ke nagana ge ke be ke bala ye, morago ga sekgalela se, le go naganišiša godimo ga yona, ka fao gore bona, yo mongwe wa bona fa, o tla go Yena, ka tsela ya go rarela, gomme o Mmotšišitše, o rile, “Mong, re rata go bona leswao go tšwa go Wena.” Ka mantšu a mangwe, Bajuda ka mehla ba rutilwe go dumela maswao. Bajuda ba nyaka maswao, ka mehla; gomme Bagerika bohlale. Gomme re hwetša gore Bajuda ba ba be ba itshama godimo ga leswao.

<sup>8</sup> Bjale, a bjo—bjo bjona bohlatse kgahlanong le Mofarisei yo, gore yena go molaleng o be a tseba Mangwalo, gore leswao la Mesia, Jesu o be a šetše a le dirile, gomme mahlo a gagwe a fifaditšwe kudu gore ga se a le lemoga. Jesu o be a, Jesu o be a mo file leswao la therešo la Bomesia le le tshepišitšwego ka Lengwalong. Eupša o be a lebeletše mohuta tsoko wo mongwe wa leswao.

9 Gomme ke therešo bjang yeo e emago le barutiši ba lehono, le batho ba lehono. Ba kgona go bona se sengwe seo se tiilego le ka Lengwalong, se tshepišitšwe ke Modimo, bakeng sa letšatši. Gomme ka gona ba kgona go bona Leo, eupša efela ba lebeletše pele go se sengwe, ba nyaka go bona se sengwe gape, gomme e sego go tšea leswao la nako.

10 O ba boditše gatee, o rile, “Le kgona go hlatha mafaufau ge le le fase, le lehubedu. Le tla re, ge le le tlasetlase le bohudedu, ‘gosasa go tla ba boso bjo bobo,’ le go ya pele.” Eupša o rile, “Le kgona go hlatha maswao ka mafaufaung, eupša, maswao a nako, ga le a kwešiše.” Ka gore ka therešo Lengwalo le boletše gore Mesia yo o tla ba moprofeta.

11 Re a tseba gore tsela ya Modimo ya go dira dilo ka mehla e be e le go romela moprofeta go hlatsela molaetša wa Gagwe. Ga se ya ke ya šitwa. E ka se tsoge ya šitwa. Modimo a ka se kgone go fetola tsela ya Gagwe. Se sephetho sa Gagwe sa mathomo se lego, se swanetše go dula ka tsela yeo. Se A se bolelago ke therešo.

12 Modimo ga se a ke a šoma ka go dihlopha tše kgolo. Ka mehla O šoma le motho ka motho. Ke ka mokgwa wo A tšerego batho go tšwa go Bantle bakeng sa Leina la Gagwe; feela motho ka motho, yo motee mo le mola, bakeng sa Leina la Gagwe. O šoma ka motho ka motho, e sego ka dihlopha.

13 Gomme re hwetša gore lebaka le ba dumetšego se, gore moprofeta o swanetše go ba hlatse ye e tsebagaditšwego ya Modimo. Ka gore ge a boletše e ka ba eng, gomme sa tla go phethega; gomme o boletše gape, gomme sa tla go phethega; le e ka ba eng a e boletšego, Modimo o e hlatseditše go ba therešo, morago O rile, “Mo kweng, gobane Ke na le yena.”

14 Bjale re hwetša gore Moshe, yo ba tleimilego go dumela go yena, o be a ba boditše gore, “Morena Modimo wa lena o tla tsoša Moprofeta wa go swana le nna, go Yena batho ba swanetše go kwa. Gomme bohle ba ba bego ba sa dumele Moprofeta yo ba be ba tla ripša go tloga go batho.”

15 Re hwetša seo go ba therešo. “O tlile go ba Gagwe Mong; ba Gagwe Mong ga se ba Mo amogela. Eupša ba bantši ba ba Mo amogetšego, go bona O file maatla, o ba file maatla go ba barwa ba Modimo.”

16 Ka fao re hwetšago Bafarisei ba ba lebeletše gabotse, le Basadutsei, godimo ga tlwa se tshepišo ya Modimo e boletšego gore O tla se dira. Gomme ba be ba sa nyaka leswao, ba sa tsebe gore leo e be e le leswao la therešo la Bomesia le A bego a swanetše go le fa.

17 Filipi o e kwešišitše, ge A mmoditše moo a bego a le gona letšatši pele. O kwešišitše yoo e be e le Mesia, o rile, “Wena o Kriste, gomme Wena o Kgoši ya Israele.” Gomme kafao o—o lemogile seo gobane o be a filwe seo. O be a le.

18 Jesu o rile, “Ga go motho a ka tlogo go Nna ntle le ge Tate wa Ka a mo goga. Gomme bohle Tate a Mphilego ba tla tla go Nna.” Ga go kgathale re leka bontši gakaakang go tsena ka tsela e ka ba efe ye nngwe, e swanetše go ba Modimo. “Ga se yo a ratago, goba yo a kitimago, ke Modimo yo a laetšago kgaogelo.” Modimo ke Yena yo a dirago kgetho. “Ga se la Nkgetha,” go boletše Jesu, “Ke le kgethile.”

19 Gomme bjale re hwetša gore molwa le Kriste, ka letšatšing la mafelelo, “o tla fora bohle ba ba dulago godimo ga lefase, bao maina a bona a sego a ngwalwa ka Pukung ya Kwana ya Bophelo go tloga motheong wa lefase.” Leina la gago le beilwe ka Pukung ya Modimo pele Kwana e hlabja. Ge lenaneo la Gagwe le beilwe ntle, selo sohle, o ile wa lemogwa ka go lenaneo leo ka gore o na le Bophelo bjo Bosafelego. Lentšu *Gosafelego*, ga se gwa ke gwa thoma gomme ešita go ka se kgone go fela, gomme o tholanakgopolo ya go nagana ga Modimo pele lefase le ka tsoge la hlolwa. Yeo ke tsela e nnoši o ka kgonago go ba le Bophelo bjo Bosafelego. Gomme Bophelo bjola, bjo A bego a nagana ka wena, bo ka go wena bjale. Ga go tsela ya go e aroganya. E ka kua go dula.

20 Hlokomelang bjale, Bafarisei ba, efela go beng barutiši ba bodumedi, dirutegi tše kgolo tša thutamodimo, le go ithuta Puku, mosegare le bošego, ba šitilwe go bona leswao lela la Bomesia, gomme ba be ba le mo ba leka go Mo kgopela leswao.

21 Gore nka iša selo pele, go le dira le tsebe gore Modimo ka mehla o fa maswao. Gobane Yena ke wa kagodimogatlhago, ka mehla O mekamekana le batho ka maswao, maswao a Lengwalo.

22 Ka go Testamente ya Kgale, ge ba bile le po—po potšišo, yo mongwe o lorile toro, gomme go be go se—go se moprofeta fale, ba mo tšeetše tlase tempeleng, moo ba bilego le se ba se bidityego Urim Thummim. Lena barutiši ba Beibele le kwešiša se ke se rago. E be e le se—se sephemasefega seo Arone a se aperego, seo se bilego le matlapa a lesomepedi ao a emetšego meloko ye lesomepedi ya Israele. Ba lekeleditše seo godimo ga kota; gomme ka gona ge moprofeta yo, goba molori yo, goba e ka ba eng e bego e le, a boletše pono ya gagwe goba toro ya gagwe, go sa kgathale e bonagetše kgonthe gakaakang, ge tšona dietsa tša kagodimogatlhago di se tša tla godimo, go dira Urim Thummim go sephemasefega sela, e gannwe. Modimo o e ganne.

23 Di swanetše go ba leswao la kagodimogatlhago go tšwa go Modimo, go hlatsela. Ga go kgathale ka kgonthe bjang, ka fao e bilego go teba ka go thutamodimo, ka fao e kwagetšego bogolo, go le bjalo, ge leswao la Modimo la kagodimogatlhago le se la e hlatsela, go be go se bjalo, go Mojuda.

24 Bjale, Testamente ya Kgale, poroto ya Arone e be e fedišitšwe, ka Kgwerano ya Kgale.

25 Eupša ka go Kgwerano ye Mpsha, Modimo o sa dutše le Urim Thummim. Ke gore, ge moprofeta, molori, moithutamodimo, goba e ka ba eng e lego, a bolela se sengwe seo se lego kgahlanong le Lentšu, gomme Modimo ga a e dire mmalewaneng morago ka Lentšu, ke tla e tlogela e nnoši, ka gore Ke Urim Thummim ya Modimo. Gomme ke e dumela ka pelo ya ka yohle, gore ke Lentšu la Modimo.

26 Gomme Modimo ke Lentšu la Gagwe Mong. “Mathomong go be go le Lentšu, Lentšu le be le le go Modimo gomme Lentšu e be e le Modimo. Gomme Lentšu la dirwa nama gomme la dula magareng ga rena.” “O a swana maabane, lehono, le go ya go ile.” Ke Yena, go le bjalo. Modimo ga a hloke mohlatholli yo a itšego.

27 Re a hlatholla, re re, “*Se, se ke sela, gomme se ke sela,*” le go ya pele.

28 Modimo ga a hloke mohlatholli. Ke mohlatholli wa Gagwe Mong. Modimo ga a re hloke go hlatholla Lentšu la Gagwe. Beibele, E ngwadilwe, gomme E rile Ga se ya tlhathollo ya sephiri. Modimo o rile, mathomong, “a go be le seetša,” gomme gwa ba seetša. Yeo ke tlhathollo ya sona. Modimo o rile, “kgarebe e tla ima,” gomme o dirile. Yeo ke tlhathollo ya lona. Ga le nyake yo mongwe go hlatholla.

29 Modimo o rile, ka letšatšing le, dilo tše di tla direga, gomme ke tšona. Ga e nyake tlhathollo ye e itšego. Ke Modimo a dirago tlhathollo ya Gagwe Mong. E a direga. Ga go kgathale re leka gakaakang go Le phetla, le go re, “Ga le re *Se*, gomme ga le re *Sela*.” Le ra feela tlwa, gomme Modimo ke mohlatholli wa Gagwe Mong. O hlatsela Lentšu la Gagwe, gomme yeo ke tlhathollo ya Gagwe ya Lona, ka gore Le tlišitšwe go phethega.

30 Bjale re hwetša baisa ba fale, ka go Mateo tema ya 12, temana ya 38 go ya go ya 40, gomme ba be ba Mo kgopela, “Mong, re tla nyaka leswao go tšwa go Wena.”

31 Gomme O be a ba kgala gobane ba be ba se ba Mo dumela, gomme ba biditše wona Moya wo o bego o le godimo ga Gagwe, “moya wo mobe,” ka go se dumeleng ga bona, gobane ga se ba kgone go Mo tsebatšša magareng ga banna ba bona—ba bona ba baruti. Ga se ba kgone go tsebatšša (ya Gagwe) moo A tšwago gona. Ba be ba sa tsebe sekolo se A tšwago go sona, ge eba O be a le Mofarisei goba Mosadutsei; gomme kgafetšakgafetša o be a leka go kgeilela fase mafelo a bona a—a thutamodimo, le go ba bitšša sehlopha sa “dinoga.” Gomme, gobaneng, ga se ba kgone go Mo tsebatšša e ka ba kae. Gomme kafao, “Monna yo o tšwa kae? Ga re tsebe moo A lego.” Gomme ga se ba ke ba lemoga lona leswao, gore O be a le Mesia, le be le le fao.

32 Bjale, go swana le mosadi yo monnyane yola sedibeng, re boletše ka yena bošego pele ga bja go feta. O le lemogile, gomme le mo diretše se sengwe. Gomme bao ba le lemogilego—lona, ba be

ba le peu ya Modimo ye e bego e swanetše go bitšwa ka letšatšing leo.

<sup>33</sup> Modimo, gomme ka mehla dinakong tšohle, ka mehla o file dimpho tša semoya go batho ba Gagwe. Ke ka mोग्वा wo A tsebagaditšwego le go tsebja, ka dimpho tša semoya. Gomme ge Modimo a romela mpho ya semoya go batho ba Gagwe, gomme mpho yela ya semoya e gannwe, gona batho bao—bao ba ya ka go leswiswi la tlhakatlhakano. Nako le nako, go kgabola mabaka, ge Modimo a romela se sengwe go batho, mpho, gomme ba e gana, gore batho ba gannwe ke Modimo gobane e ganne kgaogelo ya Modimo.

<sup>34</sup> Oo, a polokego e tla bago, bošegong bjo, go tla ba bogolwane gakaakang go feta diširetši tšohle tša pomo le—le mafelo ohle re ka naganago ka wona, ge setšhaba se, se se bitšwago setšhaba sa Bokriste, se ka kgona go amogela mpho ya Modimo ye e filwego sona, Moya wo Mokgethwa wo mogolo o tšholletšwego ntle ka go matšatši a a mafelelo. Gomme ka fao gore ge setšhaba se se ka amogela Woo, o tla ba polokego go feta e ka ba eng ba ka tsenago ka go yona. Eupša ba O ganne, kafao ga se gona se šetšego eupša tlhakahlakano le kahlolo.

<sup>35</sup> Mabaka ohle, O file dimpho tše kgolo tše tša semoya. Gomme hlokomelang ka mehla go tla ga mpho ya semoya, mpho ya therešo; ke nyaka go bolela, bošego bjo bongwe, ka “Segalontšu sa mpho,” eupša ge Morena a rata. Eupša ka mehla dimpho tše ka mehla di tsebišwa ke baprofeta. Gomme ka gona ge o bona moprofeta a tsoga go lefelotiragalo, seo se laetša gore kahlolo e kgauswi. Bjale ke leswao, ge o bona moprofeta yo a tsebagaditšwego wa Modimo a tsoga mo go lefelotiragalo; ka matšatšing a Jeremia, ka matšatšing a Daniele, ka matšatšing a—a Johane Mokolobetši, ka matšatšing a Morena Jesu, le gohle go theoga go kgabola. Ge moprofeta a tsoga go lefelotiragalo, ke nako gore Modimo o ya go bolela Lentšu la Gagwe. Ditšhaba di a Le gana, gomme ka gona tlhakahlakano e a tsena.

<sup>36</sup> Ke ka tsela ye go bilego ka go fetogeng ga mabaka a kereke, nako le nako, ge molaetša o gannwe. Gomme Modimo a efa dimpho tše le melaetša go batho, gomme ba di gana, gona ga go selo se šetšego eupša kahlolo.

<sup>37</sup> Modimo o lokile. A ka se romele kahlolo pele A efa kgaogelo. Gomme kgaogelo e boleletšwepele le ka fao e tla tlogo, eupša batho ka mehla ba hlakahlakane, le ka menaganong ya bona, le dikema tše dintši tša go fapana tša madirwakemotho, go fihla ba sa Le lemoge. Gomme yeo ke tsela ka mehla e diregago.

<sup>38</sup> Bjale re hwetša gore O ba boditše gore, “Mo—mo moloko wo mobe le wa bootswa o nyaka maswao.” Ke makga a makae mosedumele a gabilego se, ka maswao a Lengwalo, gomme a sa le dumele!

39 Modimo ka mehla o bolela ka maswao. O dirile go ya go ile. O tla dira go ya go ile. Ge feela go na le lefase, O tla no bolela ka maswao a semoya. O boleletšepele gore a tla tla.

40 Bjale ba bantši ba basedumele ba tšea seo, ge A rile, “Moloko wo mobe le, goba, moloko wa go fokola le wa bootswa o nyaka maswao.”

41 Šetšang, O be a bolela ka go seprofeto sa gabedi mo. Gape O be a ba botša gore ba be ba le moloko wa go fokola le wa bootswa; gomme gape a ba botša gore moloko e ka ba ofe wa go fokola le wa bootswa, le wo o tla tlogo, o tla amogela leswao. Hlokomelang, O rile, “Moloko wa go fokola le wa bootswa o nyaka leswao; gomme go ka se be leswao le le filwego, eupša leswao la Jona. Ka gore bjalo ka ge Jona a bile mpeng ya hlapikgolo, lebaka la matšatši le mašego a mararo; kafao Morwa wa motho o swanetše go ba ka pelong ya lefase, lebaka la matšatši a mararo le mašego.”

42 O be A bolela eng mo? O be a bolela, gore, “Moloko wo mobe le wa bootswa o tla amogela leswao la tsogo.” Gomme ke lebaka lefe le lengwe re kilego ra tla go lona, gape go feta ka mo le lego thwi bjale, go wa go gana Kriste, wo mobe, wa go fapoga, moloko wa bootswa? Gomme ba tla amogela leswao, leswao la tsogo, gore Jesu Kriste o a phela bošegong bjo feela bontši bjalo ka ge A kile a ba. O tsogile go tšwa bahung, go Mo dira wa go swana maabane, lehono, le go ya go ile. “Moloko wa go fokola le bootswa o nyaka leswao, gomme ba tla le hwetša, gomme leswao le tla ba leswao la tsogo.” Bjale, ka nnete, O be a bolela le bona, gore O tla tsoga go tšwa bahung.

43 Makga a mantši, Lengwalo le na le ya lona ya tlwaelo, goba tlhalošo ya lona ya go menagana. Boka ka go Mateo 3, e rile, “Gore go phethagale se se boletšwego ke Morena ka moprofeta, a re, ‘Ke biditye Morwa wa Ka go tšwa Egepeta.’” Bjale ge o šupa yeo morago, ke go Hosea, gomme o profetile gore, “Go tšwa Egepeta O biditye morwa wa Modimo,” e bego e le Israele. Jakobo e be e le morwa wa Modimo, gomme O mmiditye go tšwa Egepeta. Fao ke mo tšhupetše o go išago gona. Eupša, gape, Kriste o be a le Morwa wa Gagwe yo mogolwane, gomme O Mmilitye ntle, Israele e le sekai.

44 Gomme kafao gore go beng sekai sa go gana Kriste, ka go moloko wola; wo ke sekai se segolwane, bakeng sa moloko wola woo o gannego tsogo o bile le tshwarelo, eupša moloko wo wo o dirago metlae ka Moya wo Mokgethwa ga o lebalelwe. Rena re . . . Yo mogolwane ke yo a ganago Moya wo Mokgethwa go feta yo a ganago Jesu Kriste ka matšatšing a nama ya Gagwe lefaseng. Jesu o boletše bjalo, “Le bolela kgahlanong le Morwa wa motho,” ge ba rile O be a le mmolelelamahlatse goba moya tsoko wo mobe, o rile, “le bolela kgahlanong le Morwa wa motho, e tla lebalelwa lena. Eupša mang kapa mang a bolelago lentšu kgahlanong le

Moya wo Mokgethwa, e ka se tsoge e lebaletšwe bona ka lefaseng le,” ke gore, go bitša mediro ya Moya wo Mokgethwa se sebe, selo sa ditšhila, ge ba bona mošomo wa Modimo o dirwa.

<sup>45</sup> Ee, Jona o be a le hlatse ya tsogo, bjalo ka ge a bile mpenng ya hlapikgolo lebaka la matšatši le mašego a mararo. Batho ba bantši ba leka go ahlola Jona, le go bolela gore, “Oo, yena, yo mongwe le yo mongwe, o be a le Jona.” Jona o be a le moprofeta. O be a sepela tlwa ka go thato ya Modimo. Ge a tšere sekepe sela sa go fošagala gomme a tšwela ntle kua, seo se bego se swanetše go dirwa, go swanetše go ba ka tsela yeo go laetša pele tsogo ya Jesu Kriste. O ile a swanela go bapala seo, feela go swana le ge Hagara a beilwe ntle, gore mosadi wa molokologi a ka se je bohwa le mosadi wa lekgoba. Dilo tše di be di swanetše go direga, e be e le meriti le dikai tša dilo tše di tlogo.

<sup>46</sup> Bjale re hwetša, O tla tlase nako yeo, morago ga go bolela ka Jona, gomme O tla go lebaka la Salomo. Bjale, bohle re a tseba gore lebaka la Salomo e be e le Mileniamo, go nyakile, wa Testamente ya Kgale. E bile nako ye kgolokgolo, ya Israele yohle e kilego ya ba le yona, e bile ka tlase ga pušo ya Salomo; go be go se dintwa go bolela ka tšona, gomme ba bile le nako ye kgolo. Modimo o file Salomo, e bego e le morwa wa Dafida, o mo file mpho ya tlhatho, gomme bjale o kgonne go hlatha dikgopolo ka pelong ya batho.

<sup>47</sup> Bjale, ka fao Mohebere yola a emego fale a bego a swanetše go lemoga seo! Salomo o bile le m—m mpho ya tlhatho gomme o kgonne go hlatha dikgopolo ka pelong ya bona, gomme bohle ba kgobokane go dikologa Salomo, gomme efela mo go eme yo mogolwane go feta Salomo. Gomme Salomo o be a le morwa wa Dafida, eupša o be a le morwa yo monnyane wa Dafida, ka nama; gomme Jesu o be a le Morwa wa Dafida, ka Peu ya tshepišo, Peu ya bogoši. Gomme mo go be go le yo mogolwane go feta Salomo a eme kua, a dira selo sa go swana se Salomo a se dirilego, feela go beng yo mogolwane go feta Salomo, gomme ba e biditše “Beletsebubu.”

<sup>48</sup> Le bona tlhathollo ya Lengwalo? Ga go makatše O boletše se A se dirilego, “Moloko wo mobe le bootswa o tla nyaka leswao; gomme ba tla le hwetša, leswao la tsogo.”

<sup>49</sup> Gomme ka go lebaka la Salomo, go bile le tsošeletšo ye kgolo e kगतlampana. Ke tla ba mohuta wa go e fa ka seswantšho, gore ba baswa ba kgone go e kwešiša. Go bile le tsošeletšo ye kgolo yeo e bego e kगतlampana mo matšatšing a Salomo. Modimo o file mpho, gomme setšhaba ka moka se kgobokane go e dikologa. Yo mongwe le yo mongwe o tla go yona. Ba dumetše go yona, ka pelo ka moka.

<sup>50</sup> A seo e ka se be selo sa go makatša ge se ka direga magareng ga batho bošegong bjo, ge Amerika yohle, batho bohle bao ba ipitšago Bakriste bonabeng, ba ka kgobokana go dikologa mpho



ya Modimo mo matšatšing a mafelelo, go tšhollelwa ntle ga Moya wo Mokgethwa godimo ga batho! Yeo ke mpho ya Modimo ka go letšatši le la mafelelo, ke Moya wo Mokgethwa. Kriste, ka sebopego sa Moya, O fa le rena bjale. A go ka se makatše ge dikereke tšohle tšeo di ipolelago go ba Bakriste, di tla kgobokana go dikologa mpho ye kgolo ye yeo Modimo a re filego?

<sup>51</sup> Gobaneng e le? Ba e tlošitše ka go mehuta yohle ya diism le dithutotumelo le dithutotaelo, gomme o ka se kgone go bolela se e lego sona. Ke tlwa tsela ye ka mehla ba e dirilego. Eupša Modimo o e tshepišitše go otlollelwa ntle, go Peu, go le bjalo, mo nakong ya bofelo.

<sup>52</sup> Bjale hlokomelang ka go se, re hwetša gore bohle ba bona ba kgobokane go dikologa mpho ye kgolo yela, gomme Israele ya khukhuša go swana le ge go se gwa ke gwa ba pele. Ditšhaba tšohle di boifile Israele; ba be ba boifa go tla godimo kua, gobane ba tsebile gore Modimo o be a na le bona.

<sup>53</sup> Gomme ke a le botša, le bolela ka go tswalela bokomonisi le se sengwe le se sengwe; e no dumelelang Amerika go tla morago go Modimo, morago go mpho ya gagwe, morago go Moya wo Mokgethwa, gomme batho ba tla swanela go tlogela go goelesa ka bokomonisi. Go hlakile kudu ka gare go fihla ebile makomonisi a ne digongwana tša molwalebokomonisi, go hwetša ke bona bomang. Selo se swanetše go ba ka tsela yeo. Eupša a nke ba tle morago!

<sup>54</sup> Fa e se kgale kudu, ka Finland. Ngwanešu Lindsay, ke a dumela, o—o be a le fa bošegong bja go feta, o be a na le nna ge e direga. Mošemane yo monnyane, yo ke mmonego ka ponong mo, o tsošitšwe go tšwa bahung, godimo kua. Bontši bja lena, ke a thanka, le sa ne yona e ngwadilwe ka Beibeleng ya lena, ge ke kgabaganya setšhaba, ke bolela se a tla lebegago boka sona, moo a tla bago, le go ya pele. Gomme o tsošitšwe go tšwa bahung, go ya ka Lentšu la Morena. O be a bolailwe ke kotsi ya sefatanaga. Bontši bja lena le elelwa taba, gomme le eme fale ge a tsošitšwe go tšwa bahung.

<sup>55</sup> Bošegong bjoo, go theogeleng Messuhalli. Ngwanešu Lindsay le nna, le Ngwanešu Moore, le ba bantši ba monna, ba leka go ya tlase go Messuhalli; moo, ba dumeletše dikete tše dintši kudu, ba ntumeletše go bolela le bona, morago ba ba buletše le go bolela le bontši. Tseleng go theoga, ba bile le dipoloko tše nne goba tše tlhano tša toropokgolo di be di thibilwe gohle. Batho ba be ba le ka—ka mekgotheng, go re bogela re etla ka gare le go ya ntle. Gomme ka kua, fao go be go le mosetsana yo monnyane godimo ga mahlotlo, leoto le letee le lekopana go feta le lengwe, a fodišitšwe, gomme dilo tše dintši di dirilwe.

<sup>56</sup> Morago mošemane yo monnyane yo a tsošitšwego, o ile ditabeng. Ga ba ne rokenrole le dilo, ka Finland, goba ga se ba ke

nako yeo. Go be go le feela ditaba le dilo di bego di le bohlokwa, ba bilego natšo seyalemoyeng. Gomme seo se be se ile tsela yohle tlase ka Russia. Ge o phela ka Russia, gomme dimaele tše masomenne go tloga legaeng la gago, lefelobotswalelo la gago, o swanetše go ba le bisa go laetša kgwebo ya gago. Gomme ga—ga Garetene ya Tshipi e be e lokile. . . re sepeletše thwi tlase go yona, moo dithunya tša matšhenekane di bego di dutše mokgotheng, feela go tšwa ka Kuopio. Gomme bošegong bjoo, ditaba tše di be di ile tlase, gomme mekgotha e be e pakelane ka dikete atiša ka dikete tša Marussia.

<sup>57</sup> Fa go be go le masole ale a bokominisi, masole a Russia, a apere dikefa tšela tše dinnyane tša ntikodiko; le bašemane ba bannyane ba tshela ba Mafinnish, thwi ka morago ga ntwala yela, ba be ba se ba ke ba gola go lekanela go šefa go le bjalo, ba be ba le bašemane ba difahlego tša go thelela; ba rwele diputsu tše kgolo tša kgale, dijase tše kgolo tše telele, ba sepela go theoga mokgotha, ka dithamaoko tše le dilo, ba šeditše gore ke kgone go kgabola lešaba, go tsena ka gare. Mo go be go eme Marussia ale a eme kua. Ge ke etla kgauswi, ba bile go emahloko, ba swara ka mokgwa woo, gomme megokgo e kitima go theoga marama a bona. Gomme ge ke feta kgauswi, ba tlimaretše wona masole a Mafinnish le go ba phaphatha ka magetleng, le go ba gokara. Eng kapa eng e ka dirago Morussia go phaphatha Mofini, e tla rarolla dintwa. Ba rile, “Yo re tla mo amogela, Modimo yo a kgonago go tsoša bahu.”

<sup>58</sup> Seo ke se e lego bothata bošegong bjo, mogwera, tlwa. Se se ba dirilego bokomonisi, ke ka gobane baruti ba hlephišitše go Lentšu la Modimo. Ba tšere tšhelete yohle, gomme ga ba ne selo go neela morago sebakeng, feela boka lotše goba e ka ba eng gape. Seo ke se e lego phošo ka lefase.

<sup>59</sup> Ka gona re hwetša gore ka matšatšing a Salomo, bohle ba be ba kgobokana go dikologa mpho ye kgolo ye yeo Salomo a bilego le yona go tšwa go Morena. Gomme batho ba be ba etla le go sepela. Ditšhaba tšohle di boifile Israele. Sebakeng sa go leka go dira ntwala le bona, ba tlišitše meneelo ya khutšo. Ba be ba sa boife, kudu bjalo, ka monna wa bona, ba be ba boifa Modimo yola yoo bohle ba bago ba le ka kopanong le yena.

<sup>60</sup> Oo, a selo se tla bago go setšhaba se, bošegong bjo, ge bohle re ka ba ka go boifa Modimo, ge bohle re ka hlompha Modimo, le go amogela mpho ya Gagwe ya Moya wo Mokgethwa le go kgobokana go O dikologa, kereke ye nngwe le ye nngwe e pšhatla dithutotumelo tša bona le go di lahlela ka ntle ga mojako, le go ya fase aletareng le go dula go fihla Moya wo Mokgethwa o etla go tsebagatša Lentšu la Gagwe mo letšatšing la mafelelo!

<sup>61</sup> Ba bangwe ba bona ba leka go re, “Gobaneng, e no ba go Bajuda go O hwetša. Seo ke sohle se bilego go Wona.”

62 Petro o rile, ka Letšatši la Pentecost, “Sokologang, yo mongwe le yo mongwe wa lena, gomme le kolobetšweng Leineng la Jesu Kriste bakeng sa go tlošwa ga dibe, gomme le tla amogela neo ya Moya wo Mokgethwa; ka gore tshepišo ke ya lena le go bana ba lena, go bona ba ba lego kgole, le ba bantši ba Morena Modimo wa rena a tlogo go ba bitša.” Ge feela go na le Peu e letile ka lefaseng, go bitšwa, go na le Moya wo Mokgethwa go e biletša go Wona. Yeo ke nnete. O sa no swana.

63 Eupša re hwetša, ge O etla, O a ganwa. Ke ka baka leo setšhaba se tlogo ka tlase ga kahlolo. Ke ka baka leo dilo di yago ka tsela ye di lego bošegong bjo.

64 Gomme re hwetša ka go nako ya Salomo, go be go se bjalo. Bohle ba bona ba kgobokane go dikologa mpho yela ya tlhatho yeo Salomo a bilego le yona. Gomme ditšhaba tšohle di boifile Modimo. Gomme ditaba di phatlaletše ntle mogohle, “Oo, o swanetše go tla go Israele, Modimo wa bona o tsošitše mpho magareng ga bona gomme ba mo dirile kgoši. Gomme bohlale bja gagwe, tlhatho ya gagwe, e ka godimo ga tsebo ya motho. Go ka godimo. ‘Ke ka dikgaong tša badimo ntle ka fale,’ mohetene o tla bolela. Gomme ga re kwešiše ka fao go lego, eupša Modimo, Modimo wa bona, o ikemetše Yenamong ka go yo mongwe wa badumedi ba bona. Gomme, yena, ba mmeile godimo ga terone, gomme bohle ba a mo theetša.” Le a tseba, ditaba di phatlaladitšwe nako yeo e sego ka thelebišene, mogala, le go ya pele, e be e le dipounama ka tsebe.

65 Mafelelong ditaba tša phuleletša thwi tlase go kgabaganya Leganata la Sahara, tsela yohle ka go naga ye nnyane e bitšwago Seba. Ba bile. . . E be e le naga ya bohetene. Ba bile le kgošigadi ye nnyane tlase fale, go be go se pelaelo mo—mo mohumagadi yo monnyane yo mbose. Gomme ditaba tša tla go yena, gore, “Modimo o be a efa tsošeletšo ye kgolo godimo kua ka nageng ya Israele, gomme dilo tše kgolo di be di direga. Gomme ba bile le monna godimo fale a tloditšwego ka Moya wa Modimo wa bona, gore ebile le bohlale bja gagwe bo fetile e ka ba eng motho a ka naganago ka yona.”

66 Le a tseba, “Tumelo e tla ka go kwa, go kwa Lentšu la Modimo.”

67 Seo se huduile pelo ya gagwe ye nnyane. A thoma go nagana ka yona. Gomme bjale, ge kharabane ye nngwe le ye nngwe e tlile kgauswi, ntle le pelaelo, kgošigadi ye nnyane e be romela masole a gagwe ntle, le go re, “Ke tla rata go bolela le motho, sephiring, ge ba etšwa Israele.”

68 “Ee, kgošigadi, re bile godimo ka Israele, gomme, oo, go a kgahliša. O swanetše go e bona. Ga go selo boka sona. Se ka godimo ga kwešišo ya motho. O a tseba, bohle ba bona ba mmero o tee, yo mongwe le yo mongwe wa bona o thwi go dikologa mpho yela yeo Modimo wa bona a ba filego, gomme bohle ba e

dumela ka mmero o tee. Oo, ke selo se sebotsebotse kudu, gomme ga go selo sa go tlogelwa. Modimo o no utolla se sengwe le se sengwe. Ge setšhaba e ka ba sefe se ka thoma godimo fale go bona, gobaneng, Modimo wa bona o tla utolla moo ba bego ba etla, le—le go ba khukhuretša pele ba fihla kua. Oo, e be e no ba tsošetšo ye kgolo e kगतlampanago.”

<sup>69</sup> Ka gona, le a tseba, kgošigadi ye nnyane e thoma go swarwa ke tlala go e bona, yenamong.

<sup>70</sup> Le a tseba, go na le se sengwe ka yona, motho o a tseba gore o tšwa felotsoko; gomme o fa, ga a tsebe gobaneng a le fa; gomme o ya felotsoko, gomme ga a tsebe moo a yago. Gomme fao go Puku e tee feela lefaseng ye e re botšago gore o mang, o tšwa kae, se o lego, le moo o yago, gomme yeo ke Beibele. Ke yona e nnoši e go botšago, gomme ke Puku ya Modimo. Ke Modimo Yenamong a bonagadišwe ka sebopego sa lentšu, a bitšwa Peu. Peu yela ka go mohuta wa maleba wa mobu e tla tšweletša tshepišo ye nngwe le ye nngwe yeo A e dirilego, gobane ke Modimo Yenamong. Eupša e swanetše go nošetšwa ke tumelo, go e dira gore e phethagale, bjalo ka peu ye nngwe le ye nngwe. Tlhako e ka go yona. Tsebile! Hlokomelang bjale.

<sup>71</sup> Re hwetša gore ka go direng se, kgošigadi ye nnyane e thoma go swarwa ke tlala le go nyorelwa Modimo. Oo, ge—ge dimpho tša Modimo di ka kgona feela go hlola lenyora ka pelong ya batho, bakeng sa Gagwe, boka e dirile go yena!

<sup>72</sup> Bjale re hwetša, gore bana, baisesa ba bannyane, go na le mothalo ka moka wa bona o dutše mo le mafelo a go fapana, gore ba kwešiše, re tla e fa ka mohuta wa terama go bona, gore ba kwešiše.

<sup>73</sup> Bjale elelwang, o be a le mohetene. Kafao gore a dire se, le go beng kgošigadi, o be a swanetše go hwetša tumelelo go tšwa go moprista wa gagwe wa bohetene, gore a ye. Gomme ke kgona go eleletša ke mmona a eya godimo go yena le go inama, le go re, “Tate yo mogolo yo mokgethwa *semangmang*, re a tseba Baisraele ba na le tsošetšo godimo fale, gomme Modimo wa bona o ikemetše Yenamong ka sebopego sa motho, ka mpho ye kgolo, gore o tseba diphiri tša pelo. Gomme ba mpošša gore Yena ke Lentšu, gomme Lentšu ke mohlathi wa dikgopolo tša pelo, gomme ba re e šoma ka go motho. Ke tla rata tumelelo ya gago, tate yo mokgethwa kudukudu, go ya godimo kua, le go etela le go iponela nnamong.”

<sup>74</sup> Gabotse, ke kgona go eleletša karabo ya gagwe e etla morago. “Ga re ne tirišano e ka ba efe ka go tsošetšo yela,” goba yeo ke sebopego sa ’64 sa yona. Eupša, go le bjalo, ba—ba re, “Ga se ba kerekeleina ya rena. Ga se ba batho ba rena. Ga re ne selo go dira ka go yona, le gatee. O ka se ye. Gomme ga se bona selo eupša sehlopha sa—sa mekerenko. Ba kwa mehuta yohle ya mabarebare ka bona ba etla go kgabola Lewatle le Lehubedu, le mehuta yohle

ya dilo, eupša ga go selo ka yona. Modimo wa rena yo mogolo šo, o a mmona o eme ka lehlakoreng la leboto? Ba be ba le *bjalo le bjalo*, gomme makga a mantši kudu ba dirile *bjalo le bjalo*.” Kgošigadi ye nnyane e tlogile e selekegile.

<sup>75</sup> Eupša, le a tseba, go na le se sengwe ka yona, ge Modimo a thoma go bea tlala ka pelong ya motho, go no se be selo se yago go ema tseleng ya sona. Ge eba go ne tirišano goba aowa, goba ge eba go ne e ka ba eng, o swanetše go hwetša Yeo! Go swana le ge ke boletše ka mosadi yo monnyane bošego bja go feta, ka go phegelela le go kgotlelela. Le a bona, Sengwe se a go swara, gomme o swara Sengwe. Boka Jakobo, morwa wa—wa Modimo; Jakobo, morwa wa Modimo, o swere Sengwe bošego bjo bongwe, gomme Sa mo swara; gomme ga se a tsoge a Se tlogela go fihla a fihleletše morero wa gagwe, go šegofatšwa ke Sona. Seo, seo ke selo sa kgonthe. Gomme ge motho a ekiša se sengwe, ga se ya tsoge ya šoma gabotse. Eupša ge o ka kgona go swara Sengwe sela, gomme Sengwe sela sa go swara, se ya go direga.

<sup>76</sup> Ge o etla mo bošegong bjo bakeng sa phodišo, gomme wa dumelela Moya wo Mokgethwa go go swara, gomme wa O swara, o ya go hwetša se o se kgopelago. Ga go tsela ya go go thibela go Sona.

<sup>77</sup> O tla o dumela gore Jesu Kriste o a phološa, gomme go na le maatla a go phološa a go swara, gomme o a A swara, o ya go phološwa.

<sup>78</sup> Ge o dumela go kolobetšo ya Moya wo Mokgethwa, gomme Moya wo Mokgethwa o a go swara, gomme O tla go kolobetša, gomme o a Mo swara; o ka se swanele go tloga setulong sa gago, O tla go tlatša ka Bogona bja Gagwe thwi fao moo o lego. Feela bjalo ka ge A dirile, “Ge Petro a sa bolela mantšu a, Moya wo Mokgethwa wa wela godimo ga bona ba ba Le kwelego.” Sengwe se ile sa swara!

<sup>79</sup> Se sengwe se swere mosadi yola yo monnyane wa Sirofenike re boletšego ka yena bošegong bja go feta. Ga go kgathale ke dišitiši tše ka e bilego le tšona, o be a sa ya, go le bjalo. Se sengwe se swere kgošigadi ye nnyane ye re bolelago ka yona bošegong bjo, mohetene, mohetene. Kafao Mosirofenike yo monnyane yo o be a le, Mogerike, mohetene, morapedi wa medingwana ya go betlwa. Eupša Sengwe se ba swere, gomme ba swere Sengwe.

<sup>80</sup> Ka mehla go na le mathata ka tseleng. Sathane o lahlela se sengwe le se sengwe tseleng, a ka kgonago, ge a bona mosepelo wa kgonthe wa Modimo o thoma. O tla e dira go wena. O tla bea se sengwe le se sengwe, dišitiši tšohle a kgonago, tseleng ya gago.

<sup>81</sup> Elelwang, mosadi o bile le sešitiši se sentši, eupša tumelo ya gagwe ga se ebe le se se itšego. Tumelo ga e na sešitiši. Ga go selo se yago go e emiša, ga go kgathale se e ka ba mang a se bolelago. Ge o na le maswaro ao a maleba go Modimo, Modimo o na le maswaro a maleba go wena; go ka kgona go ba dingaka

tše masomenne di eme mo di go botša gore o be o ehwa, gomme o ka se dumele lentšu le tee la yona. Aowa, mohlomphegi. Aowa, mohlomphegi. Go be go ka kgona go ba banna ba masomenne ba baruti ba eme mo, go swana le ka fao ba Ahaba ba makgolonne, ba emelana; ge o le Mika gomme o swere Modimo, Modimo a go swere, gomme o se bona se hlatselwa ka Lentšung, ga go selo se yago go go emiša. O ya go ema fale, go le bjalo, gobane Sengwe se go swere.

<sup>82</sup> E utolotšwe go mosadi yo monnyane yola, gore go be go le Modimo felotsoko. Ke kgona go mmona a eya go bala disekorolo tšela tša Bahebere gape, a di phuthela le go di bea fase ka se—se sebjaneng; le go sepelela morago go moprista yola wa bohetene, le go re, “Ke nyaka go go botša se sengwe, tate yo mokgethwa. Go ka no ba bjalo, dilo tše o di bolelago. Eupša, lebelela, makgolo wa ka o rapetše modingwana wola, o badile katikasema yela o nago nayo. Makgolokhukhu wa ka o e badile, mme wa ka o e badile, batho bohle ba ka ba e badile, yohle e mabapi le se sengwe seo se diregilego. Ga se ka ke ka bona mosepelo wa wona, le bjale. Eupša ba mpotša gore ba na le selo se sengwe godimo kua e lego sa nnete, se sepelago thwi bjale; e sego histori tsoko, eupša se sengwe seo bjale se kगतlampanago.”

<sup>83</sup> “Bjale lebelela mo,” o be a tla re, “ngwana wa ka. Ge o eya, ke tla go raka. Gomme ga o na le morero, bjalo ka kgošigadi, go ikamanya ka bowena le batho ba ba bjalo ka bao.” Diabolo yola wa go swana wa kgale o sa phela.

<sup>84</sup> Ga go na lešaba le lekaonana ka lefaseng, go tsena ka go lona, go feta kereke ya go tswalwa gape e tladitšwego ka Moya wo Mokgethwa. Ga ke kgathale moo e lego, ge e le ka mokgobeng goba e ka ba kae e lego. Ke lešaba le lekaonekaone. Ke sehlopha sa legodimo, hlokomelang, badumedi ba ba dumelago go Modimo.

<sup>85</sup> Pelo ya gagwe e be e rethetha boima, ka tetelo. O be a nyaka go bona. O be a kwele ka yona. O be a sa tsebe selo ka yona, eupša o be a nyaka go e bona. Gomme ke kgona go mo kwa a re, “Gabotse, o ka no tloša leina la ka pukung, ge o nyaka. E ka ba eng o e bolelago, le yona medingwana, le tšona dipuku le dilo, ke go bona o tšwelapele o bolela ka se sengwe, o bolela ka se sengwe. Ga se wa ke wa šutha. Ga se ka ke ka bona mosepelo wa wona le bjale. Ke nyaka se sengwe e lego sa kgonthe,” gomme o ba komana go sepela. Gampe kudu ga re sa na bontši bja bona dikgošigadi tše nnyane lehono! Nnete.

<sup>86</sup> Kafao gona re hwetša gore bjale, gore a ye, o šomišitše mathaithai a mabotse kudu. Ke tla rata yo mongwe le yo mongwe go nagana ka se. Bjale o rile o be a sa tsebe. O be a badile disekorolo tšohle, go hwetša se Jehofa a bego a le sona, go bona ka tsela ye A šomilego ka matšatšing a a fetilego. “Ge go le bjalo, gona O tla itsebagatša Yenamong le monna yo bjalo ka ge ba

boletše o be a le, gona yoo e be e le Jehofa. Gomme ge e be e le Jehofa, gomme O be a le Modimo wa therešo, Modimo wa ba ba phelago, e sego sehlwaseeme goba segopotšo sa sebopiwa tsoko se se phetšego goba se sego sa phela; yo e be e le wa go phela, Modimo wa gonabjale,” kafao o nyakile go ba komana go sepela. Bjale o rile. . .

<sup>87</sup> O rwele tšhelete ye ntši. O tšere gauta, le mira le, oo, setlolo, ke a nagana, le silibere. Gomme o be a laišitše dikamela le yona. Bjale o boletše se, “Ke ya godimo. Ke ya go lebelela ka go yona, nnamong. Gomme ka gona ge go le bjalo, ke tla e thekga; ge go se bjalo, nka se be le selo go dira le yona.”

<sup>88</sup> Le a tseba, o be a ka kgona go ruta Mapentecostal se sengwe. Bontši bja bona ba thekga lenaneo leo le segago le go dira metlale ka lena. Gomme o thekga lenaneo mo moyeng, leo le dirago metlale ka dilo tše o dumelago go tšona. Gomme yeo ke nnete. Ee, mohlomphegi. Gobane e kwagala gabotse. Nnete, “Go na le tsela ye e bonalago e lokile go motho,” Jesu o boletše.

<sup>89</sup> Eupša mo hlokomeleng, o rile, “Ge e se yona, gona nka kgona go gomiša dimpho tša ka.” Eupša o be a eya go iponela yenamong, le go kgodišega. O be a badile disekorolo, o tsebile se Jehofa a bego a le sona, gomme o be a tla bona. Ge A be a le, ke Yena, gona O sa le Jehofa.

<sup>90</sup> Seo ke se sebotse lehono. Jesu Kriste ke se A bego a le sona, gomme ka mehla O tla ba sona. Ga A tsoge a fetoga. Beibele e rile, “O a swana maabane, lehono, le go ya go ile.”

<sup>91</sup> Re hwetša mosadi yo monnyane nako yeo, bolela ka dišitiši, ka gona se se ka no ba se tlile ka monagano wa gagwe, “Elelwang, ke swanetše go kgabaganya leganata, gomme leo ke leeto le letelele kudu.” Le ele, go tšwa Israele, go tšwa Palestina tlase go ya ka Seba, go kgabaganya Leganata la Sahara. Go be go tla tšea kamela e ka ba, ke a nagana, dikharabane, go be go tla di tšea matšatši a masomesenyane, dikgwedi tše tharo, di sepela kgafetšakgafetša, go tloga lefelong le tee go ya go le lengwe. Letšatši a mararo. . . dikgwedi tše tharo, go ya. Gomme e no nagana, o tlile go kgabaganya leganata lela la go fiša. O be a na le seo ka monaganong wa gagwe, o be a swanetše go se dira, go kgabaganya leganata lela la go fiša, tsela yohle godimo mo, go hwetša ge eba yo ka therešo e be e le Modimo.

<sup>92</sup> Ga go makatše Jesu o rile, “O tla ema le moloko wo gomme a o ahlola.” O be a se na le Cadillac ya sefehlamoya. Gomme batho ba bangwe mo ka Dallas ba ka se tle go kgabaganya mokgotha, go Le kwa. Yeo ke nnete. Ga go makatše o tla ema mo matšatšing a mafelelo! Eupša ba ema godimo felotsoko gomme ba Le swaswalatše, e ka ba kae gape ba a e dira. O rile, “O tla tla go tšwa dikarolong tša kgolekgole tša lefase go kwa bohlale bja Salomo, gomme yo mogolwane go Salomo o mo.” Hlokomelang.

93 O be a na le seo go mo lebanya. Go molaleng o be a swanetše go sepela bošego, go fiša kudu leganateng. Mahlasedi thwi a letšatši godimo ga Leganata lela la Sahara a tla tloša letlalo thwi go tloga go wena, gomme fao o ile a swanela go sepela mohlomongwe bošego.

94 Selo se sengwe, elelwang, o be a laišitšwe tlase ka meneelo le dilo. Barwa ba Ishmaele e be e le banamelapere. Ba be ba le bahlakodi mo leganateng. Go be go tla ba bonolo bjang go bana ba Ishmaele go tla ka gare boka lefula, gomme ba ripa balaki ba babedi goba ba bararo ba bannyane a bego a na le bona le yena; sehlopha sa gagwe se sennyane sa masole, balaki, le methepana ya gagwe ye mennyane; ba ba ripaganya le go ba tlogela ba robotše kua, le go rwala masome a dikete atiša ka dikete tša mabje bohlokwa a go turwa ditolara, ka ntle ga setlolo le mira, le dilo tše a bego a di tliša bakeng sa mpho.

95 Eupša go na le se sengwe ka yona, ge pelo ya gago e beilwe go bona Modimo, gomme Sengwe se go swere, ga o tsebe kotsi, ga o tsebe phenyo. Go na le se sengwe, o ya go se hwetša, go le bjalo, ga go kgathale se bothata bo lego.

96 Nnete, go be go lebega bjalo ka peakanyo ya bahlakodi. Yo mongwe le yo mongwe wa bona a ka be a tlile, eupša ga se a tšee kgopolo ya kotsi ye e itšego.

97 Ga se a ke a tšea kgopolo ge eba o be a ka kgona go emelela gomme a sepela, boka yo mongwe a boifa go tsoga go tšwa malaong goba khote, goba se sengwe goba se sengwe, “Ga ke tsebe, le a bona, ke boifa go e dira.” O be a se na le mohuta woo wa poifo. Sengwe se be se mo swere.

98 Gomme ge Sengwe se ka kgona go re swara, ka mokgwa wa go swana, se sengwe se ya go direga. Bjale, o ka se kgone go e dira go fihla Seo se go swara, bokaone o se e leke. Eupša ge Seo se go swara, e ya go direga.

99 Hlokomelang, šo yena, ga se a ke a gopola gore ke bahlakodi ba bakae ba bego ba le gona leganateng.

100 Goba, gape, ge a fihla godimo kua, a o be a tla amogelwa, goba aowa? O be a le wa kerekeleina ye nngwe, le a tseba, kafao a o be a tla amogelwa, a o be a tla amogelwa ka kopanong? Ga se a kgopelwe go tla. Moya wo Mokgethwa o šomile go yena, go tla, kafao O be a le Yena a dirago tlhahlo; kafao, go kgotsofatša maikutlo ao a bilego le wona, gore o dumile go tseba.

101 Elelwang, ke bophelo bja gago. E be e le bophelo bja gagwe. O na le feela nako e tee go e ruma, gomme mohlomongwe bošegong bjo ke sebakabotse sa gago sa mafelelo. O gana Kriste, bošegong bjo, o ka no se be le sebakabotse se sengwe.

102 Gomme seo e ka no ba e bile sebakabotse sa gagwe sa mafelelo. O ile a lemoga seo. A bja gagwe bja go tonya, bodumedi bja sebopego a bilego le bjona, go lokile, goba a ka therešo go be



go le Modimo yo a phelago? O be a se a bona selo ka go bodumedi bja gagwe mong, eupša o be a kwele go be go le Sengwe ka go bjo bongwe, gomme o be a badile ka se A bego a le sona. O be a nyaka go se bona. E be e le bophelo bja gagwe bo be bo le kotsing.

<sup>103</sup> Ke bophelo bja ka, bošegong bjo, ke swanetše go lebanya se. Ke swanetše go tla Kahlolong, kafao o swanetše go tla Kahlolong. Go a re swanela go dula ka madulong a rena, go robala mepeteng ya rena, goba e ka ba kae re lego, le go šetša selo se go teba. Gobane, ga o tsebe ke nako efe karata ya gago e yago go tšeelwa ka ntle ga raka ya Modimo godimo Kua, gomme o tla araba mo Kahlolong. Ge eba o moleloko wa kereke goba ge eba ga o yena, seo ga se ne selo go dira le yona. O ya go araba, go le bjalo, gomme bokaone o be le nnete ya yona. Hlodišiša boitemogelo bja gago le Modimo, bona ge eba Sengwe ka kgonthe se go swere, seo se go tliša morago go Lentšu le, kgole go tloga go dithutotumelo le dibopego, le go ya pele. O e tshepišitše ka matšatšing a mafelelo, “Go tla ba le go retologa, gape, ga dipelo tša bana go ya go botate.” Gomme re dumela seo. Hlokomelang, re e hwetša mo letšatšing le bjale.

<sup>104</sup> Gomme ga se a tšee kgopolo ya poifo goba e ka ba eng e bego e swanetše go mo tshwenya. O be a sa nagane ka seo. Kgopolo e be e le, o be a nyaka go hwetša ge eba E be e le kgonthe goba aowa, kafao o ile go kgabaganya leganata. Gomme e sego . . . O bile le nako ye thata go e dira. E ka ba eng yeo o nago . . .

<sup>105</sup> Bjoo ke bothata, rena Mapentecostal, re no ba le se sengwe le se sengwe se neetšwe rena, godimo ga poleiti, se sengwe le se sengwe re se nyakago. Modiša ga a tle feela ka nako, “Ke tla tlogela Assemblies le go tšoena kereke ya Modimo.” Gomme, le a tseba, e no ba . . . re nno pepetletšwa go dikologa!

<sup>106</sup> E a nkgopotša, go be go na le letswai la kgale, nako ye nngwe, le etšwa lewatleng. Gomme moreti o ile tlase, ga se nke a ke a bona lewatle; o be a ngwadile ka lona, eupša ga se nke a le bona. Letswai la kgale le kopane le yena, o rile, “O ya kae, monna wa ka wa go loka?”

<sup>107</sup> O rile, “Ke ya lewatleng. Ke nna moreti. Ke ngwadile ka lewatle. Ke hlogetše go nkelela meeteletswai, le go bona maphotho a lona a magolo a letswai a taboga go dikologa dinonyanawatle di opela, le leratadima le bolou le iponagatša lonamong ka lewatleng.”

<sup>108</sup> Letswai la kgale le kgogile peipe ya gagwe makga a mane goba a mahlano, le lebeletše fase, gomme la tshwa. O rile, “Ke tswetšwe go lona, mengwaga ye masomešupa ya go feta. Ga ke bone selo sa kgogedi kudu ka lona.” O be a phetše go lona, botelele kudu, go fihla e eba setlwaedi.

<sup>109</sup> Seo ke se e lego sona ka rena, bošegong bjo. Re phetše ka Bogoneng bja Modimo, botelele kudu, go fihla E eba setlwaedi

go rena. Re swanetše go itsoša renabeng, le go lemoga gore Jesu Kriste o a phela gomme o tsoBILE go tšwa bahung.

<sup>110</sup> Se e be e le sohle go ba boitemogelo bjo boswa go kgošigadi ye nnyane ye. O be a phegelela. O be a nyaka go bo bona. Ka nnete, o be a phegelela. O ile a swanela go phegelela, go tlogela setšhaba sa gagwe. O be a na le maemo a gagwe ohle, o be a swanetše go a tlogela morago. Ke eng sa sosaete sohle sa gagwe sa karata le tšohle a bego a le wa tšona, tšohle dihlopha tša go mena le go roka, le dilo tšeo a bilego wa tšona, bjalo ka kgošigadi, batsebalegi bohle bao a ba tsebilego? O be a tla ba sesegišwa go sehlopha sela. Eupša e dirile phapano efe go yena? E be e le soulo ya gagwe.

<sup>111</sup> Ke soulo ya gago. Ke soulo ya ka. E dira phapano efe go Methodist, Baptist, Presbyterian, goba Oneness, Twoness, Threeness, goba e ka ba eng e lego? Ke soulo ya ka ye e amegago. Ke soulo ya gago ye e amegago. Ke Lentšu la Modimo le le hlatsetšwego.

<sup>112</sup> Re a mo hwetša, ga se a dire phapano ye e itšego go yena, se e ka ba mang a se boletšego, goba se batsebalegi ba gagwe, se bagwera ba gagwe, ge a be a swanetše go tlogela se sengwe le se sengwe se bego se le lefaseng. Ge E be e le kgonthe, o be a le komana go ya go Yona. O be a tla fa mmušo wa gagwe, e ka ba eng gape. Ge E be e le kgonthe, o be a nyaka go hwetša Modimo. Go be go le se sengwe ka pelong ya gagwe.

<sup>113</sup> Re hwetša, o tlike go kgabaganya leganata. Mafelelong, letšatši ka morago ga letšatši, matšatši a masomesenyane, dikgwedi tše tharo, kharabane mafelelong ya fihla kgorong.

<sup>114</sup> Bjale, ga se a tsoge a tla boka batho ba bantši ba dira ka dikopanong lehono. Ba bantši ba bona ba a tla gomme ba tla re, "Uh, ke a kwa ba ne, uh, yo mongwe o mpoditše ba bile. . . Uh-huh. Gabotse, ke tla ya godimo." Gomme ba tla dula fase feela nakwana. Ba šetše. Le ba bona mogohle. Ba tla re, "Lentšu la pele a le bolelago leo le lego kgahlanong le tumelo ya ka," ba tšwa mojako, ba ile. "Nka se tsoge ka ya morago go kwa ye nngwe gape." Le a bona, ba no se dule botelele go lekanela. Yeo ke yona.

<sup>115</sup> Go reng ka ge, Jesu, ge A be a dutše pele ga ba masomešupa ba Gagwe kua, gomme O bile le masomešupa gomme O bile le lešaba ka moka? O be a le Monna yo mogolo. "O be a le Moprofeta," ba rile, "Moprofeta wa Galelia." Letšatši le lengwe O lebeletše godimo ga lešaba le legolo lela le eme go Mo dikologa, O rile, "Ntle le ge le eja nama ya Morwa ya motho, le go nwa Madi a Gagwe, ga le na Bophelo ka go lena."

<sup>116</sup> A le ka eleletša bomatwetwe ba dutše ntle fale, se ba se boletšego ka Monna yola? "Gobaneng, O tla dira dinwamadi go tšwa go rena. Go nwa Madi a Gagwe le go ja nama ya Gagwe?"

<sup>117</sup> Ga se nke A e hlaloša. O be a se a swanela go e hlaloša. O ile a swanela go hlohlora dinwamadi tšeo di bego di le tikologong ya

Gagwe. Sebakeng sa go leka go fepeletša le go bea leina la bona mo pukung, O be a ba hlohlora. O be a se ne go ba šomišagape. Kafao re hwetša, O be a le fale, O rile, “Ntle le ge. . .” Ga se nke A e hlaloša.

118 Šetšang, barutiwa bale ba dutše go homola. Ga se nke ba bolela selo.

119 Ke bona ngaka le go bona Bafarisei, ba rile, “Le a bona, Monna o hlakane bjaša bja Gagwe. O a gafa, o re nyaka re sege mmele wa Gagwe bjale le go o ja, le go nwa Madi a Gagwe? Senwamadi a batho! Gabotse, rena, re ka se kgone go dira selo boka seo. Oo, bjoo ke bohanya. Monna o hlakane bjaša bja Gagwe.” Ba sepetše.

120 Ka gona O lebeletše go dikologa go baithutamodimo bale ba dutše go Mo dikologa, bona ba masomešupa, gomme O rile, “Le tla reng ge le bona Morwa wa motho a rotogela godimo ka Legodimong moo A tšwago gona?” Bona Dingaka tša Bokgethwa ba lebeletše go dikologa, ba rile, “Morwa wa motho a rotogela godimo ka Legodimong moo A tšwago? Gobaneng, re a Mo tseba, re bile go setala moo A tswetšwego. Re bone thari ye A kobakobeditšwego ka go yona. Re tseba mme wa Gagwe. Re. . . O thea dihlapa le rena. O tsoma le rena. O ntle mo godimo ga dithaba. O apara diaparo tše re dirago, o ja dijo. Gomme Morwa yo wa motho, O tšwa kae? O tšwa Nasaretha. Se ke bontši kudu go rena.” Ba tlogile. O be a no se E hlaloše. Le a bona?

121 O lebeletše, gomme O lebeletše go dikologa go ba lesomepedi, o rile, “A le tla sepela le lena?”

122 Bjale, ga se ba kgone go e hlaloša le bona, eupša Sengwe se bile le go ba swara. Le a bona, ba tsebile! Moo ke ge Petro a boletše mantšu ao a segopotšo, “Morena, re bone Lengwalo le hlatselwa ke Wena. Re tla ya kae? Re a tseba gore O na le Mantšu a Bophelo. Wena o Mothopo wa Bophelo. Re kgotsofetše ka Wo.”

123 Jesu o rile, “Ke kgethile ba lesomepedi ba lena, gomme yo motee wa lena ke diabololo.” Le a bona, O be a se na le marapo, le go pholetšha, le go fepeletša, le go ba phaphatha ka magetleng, le go ba kolobetša sephiring, goba se sengwe gape.

124 O—O be a le Modimo a dirilwe nama lefaseng. O be a le Lentšu la Modimo le le hlatsetšwego. Gomme bao ba swerwego ke tlala, ba a tla. Bao ba sego ba swarwa ke tlala, ga se ba kgone go tla. O rile, “Bohle Tate a Mphilego, ba tla tla.” O ka kgona bjang go tla gona ntle le ge A file, a filwe?

125 Bjale hlokomelang, re hwetša kgošigadi ye nnyane ye, mafelelong o fihlile. Ga se a ke a leta go no swana le ka mo batho bale ba dirilego. Ba bangwe ba bona ba mo latetše mmogo.

126 Ka mehla go ne magoro a mararo a batho; badumedi, baitirabadumedi, le basedumele. Mosedumele o tla rutlomologa gomme a tloga; moitiramodumedi o tla ema tikologong lebaka

la nako ye telele. Fao bohle boraro bja bona ba be ba le gona. Mosedumele, lešaba; moitiramodumedi, sehlopha se se retologetšego kgole mafelelong. Eupša fao go be go le modumedi wa mmapale yo a bego a sa kgone go Le hlatholla; ga se ba tseba selo ka Lona, eupša ba tsebile gore O be a le Lentšu. Seo se e rarolotše!

<sup>127</sup> Fao re hwetša kgošigadi ye nnyane. O be a tlišitše dijo ka moka tše ntši, diripa tše ntši tša borotho, le dilo tše ntši. O tlišitše ditente tša gagwe le dilo. O fološitše dilo tša gagwe go tšwa dikameleng, le dilo, ntle ka jarateng, dikgorong tša tempele. Gomme o hlomile ditente tša gagwe, gomme o be a le fao go dula go fihla a kgodišegile ge eba e be e le nnete goba pošo.

<sup>128</sup> Ga go pelaelo, letšatši ka letšatši, o be a badile Mangwalo ale. Nako ya bošego, ka kgonagalo ba ile ba swanela go sepela bošego. Nakong ya mosegare, nako yeo o be a dula morago ka tlase ga mehlare yela ya mepalema, ka sediba mo leganateng, le go bala se Jehofa a bego a le sona, se A bego a swanetše go ba sona. Bjale o be a tla tseba Jehofa. Ge A be a le ka go monna yola, o be a tla tseba tiro ya Gagwe, o be a tla tseba ge eba e be e le nnete goba aowa. Kafao o be gohle a beilwe ka Lengwalong.

<sup>129</sup> Ga se a ye kua le go re, “Bjale, ge a bolela e ka ba eng go fapana go tloga go se moprista wa ka a se bolelago, ke tla no topa dikamela tša ka le go tloga.” O be a eya go dula go fihla a kgodišegile.

<sup>130</sup> Oo, ge banna le basadi ba ka no dira seo lehono! Tšeang Lengwalo, bonang ge eba Moya wo Mokgethwa ke wa lehono, goba aowa, bonang ge eba dilo tše re bolelago ka tšona di boleletšwepele go iri ye re lego ka go yona. Eupša o dirile; ke ka baka leo Jesu a rilego leina la gagwe ga le palelwe. . . ga le palelwe, eupša ga le hwe. O tla ema ka Letšatši la Kahlolo gomme a ahlola Dallas, Texas. O tla ahlola United States, ka Letšatši la Kahlolo. Ka gore, o tlile go tšwa dikarolong tša kgolekgole tša lefase, go kwa bohlale bja Salomo; gomme, bonang, yo mogolwane go feta Salomo o fa. Jesu Kriste yo a tsogilego o fa ka maatleng a tsogo ya Gagwe. Hlokomelang.

<sup>131</sup> Gomme o hlomile ditente tša gagwe. Ke kgona go eleletša mosong woo, bakeng sa bana bjale. Dipele di be di lla, diphala-fala di be di lla, gomme kereke e be e kcatlampana. Ba be ba na le kereke letšatši le lengwe le le lengwe. Naganang ka yona, ba ratile go ya kerekeng letšatši le lengwe le le lengwe. Kafao bona, kereke e thomile, ke a eleletša kgošigadi ye nnyane e ile moragorago ka morago le go dula fase. Gomme ka morago ga lebakana diphala-fala tšohle di llile, dipina di be di opelwa, le se sengwe le se sengwe.

<sup>132</sup> Morago ga lebakana, Modiša Salomo o tlile ntle, a dula fase. Ka fao batho bohle ba bego ba mo hlompha, gobane ba be ba mo rata. O be a le mohlanka wa Modimo. Gomme ba tšwetše ntle, go

be go se yo motee a rego, “Huh! Ge nkabe a no ba *se*, ge nkabe a no ba wa sehlopha sa ka!” Aowa. Go be go le sehlopha se tee feela, gomme seo e be e le—seo e be e le bona, kafao ba be ba le fao.

<sup>133</sup> Gomme ka gona re hwetša, yo mongwe o tla godimo. Gomme selo sa pele le a tseba, Salomo o utolotše sephiri sa pelo ya bona. Ke tla eleletša kgošigadi ye nnyane e rile, “Bjale ema motsotso feela,” le a bona. “Nna, seo se kwagetše kgonthe.” Wa go latela o tla godimo, o hweditše selo sa go swana. Oo, pelo ya gagwe ye nnyane e thoma go taboga. O, o maketše.

<sup>134</sup> Kafao o swanetše go be a hweditše karata ya thapelo, le go leta. Swarelang tlhagišo yeo; eupša, le a tseba, go no dira ntlha, le a bona. A ka no ba a hweditše karata, gomme o letile. Letšatši le lengwe karata ya gagwe e biditšwe, gomme o tllile godimo pele ga Moya wo Mokgethwa wo o bego o šoma ka Salomo. Gomme Beibele e rile, “Go be go se selo se utetšwego Salomo.” Moya wo Mokgethwa wo mogolo o utolotše se sengwe le se sengwe a bego a na le tlhoko go se kwa; O se utolotše.

<sup>135</sup> Gomme mo go be go le Moya wo Mokgethwa, botlalo bja Wona ka go Jesu Kriste, o dira selo sa go swana; gomme Bafarisei bale ba re, “Re bontšhe leswao. Fodiša monna *yo* ntle fa. Dira *se*, gomme o bolele *se*. Gomme *se* e tla ba eng, goba *sela*?” Le a bona, ba no se kwešiše.

<sup>136</sup> Kgošigadi ye nnyane ye e eme fale, gomme Beibele e boletše gore, “Ga se gona se utetšwego Salomo.” O utolotše dilo tšohle tše a bego a hloka go di tseba. O mmoditše tšohle ka yona.

<sup>137</sup> Gomme ge e dirile, o be a se a swanela go tšea lentšu la yo mongwe gape, o be a le šeditše gomme o le dumetše. Nako yeo o retologetše go batheeletši, gomme o rile, “Tšohle ke di kwelego, ge ke e kwele, ke maketše. Eupša tšohle ke di kwelego di bjalo, le bontši go feta ke kwele di bjalo.” Le a bona, e be e le go retologa ga gagwe, o be a e bone. E be e šomile go yena. O tsebile e be e le kgonthe. Gomme o rile, “A go šegofatšwe Morena Modimo Yo a go dirilego mohlanka wa Gagwe. A go šegofatšwe. . .”

<sup>138</sup> E be e le eng? Mosadi yo monnyane wa go šokiša o be a phetše kua, dithutotumelo tšela tšohle le medingwana, gomme nako ye nngwe ka pelong ya gagwe ya go swarwa ke tlala. . . Modumedi e ka ba mang wa kgonthe o nyaka go bona Modimo mo tirong. Ge A kile a ba Modimo, O sa le Modimo. Gomme o bone se sengwe seo e bego e le sa kgonthe, e sego go itiriša; sa mmapale sa kgonthe. O diretše Modimo matšatši a gagwe ka moka, ka gore o bone se sengwe e bego e le sa kgonthe.

<sup>139</sup> Oo, mogwera, re bone ba bantši kudu, “Tšoena thutotumelo ye, Moslem yo, *yo*,” e ka ba eng e lego, “etla go *se*, le *se*, *sela*, le *se sengwe*,” le mehuta yohle ya maikutlo le dilo. Ka nnete lefase le swanetše go swarwa ke tlala bošegong bjo bakeng sa se sengwe sa kgonthe, go bona se sengwe seo e lego sa mmapale. E sego

sehlopha tsoko sa nonwane sa madi a go ela, goba mengwapo, goba oli, goba se sengwe seo ebile e sego sa Lengwalo; eupša Jesu Kriste wa kgonthe Yo a tshepišitšego gore O tla phela ka go batho ba Gagwe mo matsatšing a a mafelelo, le go dira dilo tše A di dirilego, se sengwe seo Mangwalo a rego se tla direga mo matsatšing a.

<sup>140</sup> Dithutotumelo tšohle tše dinnyane tše, “Gabotse, ge o tseba thutotumelo ya rena, o a tseba.” Le a bona, o—o—o lebeletše morago go se Mna. Luther a se boletšego, monna yo mogolo wa letšatši la gagwe. Nnete. Go se fete ba bangwe ba basadi ba mo, bogolo bja mengwaga ye masomešupa tlhano, ba leka go ba lesometshela, ba lebeletše morago le go leka go apara boka ba le lesometshela, ba ripa moriri wa bona le go apara dišothi, le go dira . . . Mang kapa mang yo a otelago, a lebeletše ka seipone sa go bona sa morago, o na le go tlhekgemana. Gomme seo ke se e lego bothata ka kereke lehono, e lebeletše ka seipone sa go bona sa morago, go se e bego e le sona. Ga go makatše e tlhekgemane. Go se tsoge ya . . .

<sup>141</sup> Paulo o rile, “Go gatelela go mmaraka wa Pitšo ya godimo, ke ya pele. Ke ya pele.” Ke a tseba Mna. Moody e be e le monna yo mogolo, Mna. Wesley e be e le monna yo mogolo, mosepelo wa Pentecostal, mosepelo wa Baptist, e be e le wo mogolo, eupša a re gatelele go ya mmarakeng wa Pitšo ya godimo ka go Kriste. Le se ke la lebelela ka seipone sa go bona sa morago, mengwaga ye masomenne ya go feta. Lebelelang se se lego bošegong bjo. Lebelelang se Lengwalo le se tshepišago bošegong bjo. O ba tshepišitše ka letšatšing leo, eupša re phela godimo kua bjale. Re ya pele.

<sup>142</sup> Go ka reng ge nkabe Wesley a lebeletše morago gomme a bone eng, Luther, le a bona? Eupša ga se a ke a lebelela se Luther a se boletšego, o ile a lebelela se Modimo a se boletšego. Go ka reng ge Pentecostal e lebeletše morago go leba go Methodist? Le bona moo le ka bego le bile? Ke lena bao, selo sa go swana, le kgatlofaditše le go e pitlaganyetša fase, le ka se kgone go šutha kae kapa kae. Bjale Moya wa Modimo o no sepelela thwi pele ka ntle, o O tšeela felotsoko gape.

<sup>143</sup> Nako le nako ge ba e dira, tshepedišo ya madirwakemotho mo o hwetšago ka moka go šomela godimo ka mokgwa woo, gape go swana le polelo ya go ganetša ya Kora, ka fao Dathane le bona ba bego ba nyaka go hwetša sehlopha se segolo sa monna le go dira mokgatlo ntle kua. Modimo o rile, “Ikaroganye wenamong, Moshe, go tloga go bona, gomme Ke tla ba metša thwi ka lefaseng.” Gomme seo e be e le sekai sa leeto lehono, gomme le a e tseba, tseleng go ya nageng ya tshepišo. Gomme ba be ba le fao. Ba be ba sa kgone go dumela molaetša wola wa go tlotšwa wa Modimo, wo o bego o sepelela thwi pele, gomme ba nyakile go thoma se sengwe bonabeng. Ka mehla go ka tsela yeo.

144 Mosepelo wa Israele wa go tlalelwa kudukudu ba kilego ba o dira, ge ba ganne mogau, ka go Ekisodo 19, gomme ba tšere molao. Gomme Dathane o dirile phošo ya go šiiša kudukudu a kilego a e dira, ge a rile, “Go na le baetapele ba bantši ka fa ntle le wena, Moshe.”

145 Gomme—gomme o be a hlatseditšwe gore o be a le Lentšu la Modimo le le bonagaditšwego. O be a tšere lerole gomme a le fetolela go matsetse. Gomme se sengwe le se sengwe a se boletšego se be se tlile go phethega. Gomme Modimo o be a na le yena. Pilara ya Mollo e be e hlatseditšwe, e lekeletše ka godimo ga gagwe fale, gomme go le bjalo ba be ba sa nyaka go thoma se sengwe gape. Seo e no ba madirwakemotho.

146 Ke ka tsela ye go lego lehono. Ke moo kereke e fihlilego. Yeo ke nnete. Oo, kereke ya Modimo yo a phelago, a ga le nyake go bona se sengwe sa kgontho? Se sengwe sa kgontho!

147 Kanegelo ye nnyane pele ga go rapelela balwetši. Ke rata go tsoma. Mme wa ka, le a tseba, o . . . o . . . mmagwe o gotše phenšene. O be a le Moindia wa Cherokee. Ke . . . gomme tshokologo ya ka ga se nke ya tšea lerato la dikgwa. Ke a se rata. Ke moo le bonago Modimo. Fao ke mo la mathomo ke bonego Modimo, o be a le ntle kua ka dithokgweng. Fao ke mo A kopanago le rena. Fao ke mo A dirago polelo. Fao ke mo Barongwa bale ba šupago ba kopanego. A le . . . go, *Bahlomphegi, Ke Nako Mang?*

148 Ngwanešu Borders le nna re be re dutše fale letšatši le lengwe, ge yela (go ema) go theoga, sesasedi go tšwa magodimong, ebile se kgomotše maswika ntle, thwi ka godimo moo ke bego ke eme fale, se A se boletšego, le a bona. Gomme fale, oo, monna ba bantši, Ngwanešu Sothmann ka fa felotsoko, yo mongwe wa . . . Terry, ke a dumela godimo mo, o be a le gona ka nako yeo. Gomme dilo, o Mmona ka lešokeng ntle kua! Ke rata go tsoma. Ke dira seo go no tšwela ntle, e sego go bolaya phoofolo, eupša go no ba ka dithokgweng.

149 Ke be ke tsoma le moisa godimo ka New York, godimo ka New Hampshire, a ke re, o be a le mo—mo motsomi yo mokaone. Leina la gagwe e be e le Bert. O be a le monna wa Moisemane. Gomme batswadi ba gagwe—ba gagwe ba hlomilwe, goba ba ripa seo, moo ba bitšago Jefferson Notch, go kgabola fale, le godimo ka Carroll Notch, le go aroganya tšela mo matšatšing a pele. Go be go le Boindia bjo bonnynae ka yena, gape. Eupša o be a le yo mongwe wa bathunyi ba bakaonekaone nkilego ka ba bona, gomme yo mongwe wa batsomi ba bakaonekaone. Ga se wa tsoge wa tshwenyega ka go ya ntle le go mo tsoma; o tsebile moo a bego a le gona. Ke be ke rata go tsoma tshepe ya moselamošweu godimo fale. Gomme ba . . . Gomme ke be ke tla ya godimo lehlaluleng le lengwe le le lengwe le go tsoma.

150 O be a le motsomi yo mokaone bjalo, eupša o be a le monna yo sehlogohlogo nkilego ka kopana le yena bophelong bja ka. O bile le mahlo boka mokgaritswane, gomme o no . . . Yona mehuta, le a tseba, boka basadi ba leka go penta mahlo a bona lehono, mohuta wa boka mokgaritswane. Gabotse, ka kgonthe o bile le mohuta wola wa leihlo. Gomme ga go bogege boka motho, go nna. Gomme kafao ka mehla ke—ke mohuta wa go hloya go mo lebelela. O be a lebega go thelela ka mokgwa woo, le a tseba, go lebelela wona mahlo ka mathoko.

151 Gomme o be a rata go ba swele. Gomme o be a thunya mabotlana, yeo ke tshepe ye nnyane ya lesea, go no ntira ke ikwele gampe. Gomme o be a tla re, “Oo, moreri, o swana le ka moka ga bona. O pelo ya kgogo. O be o tla ba motsomi yo mokaone ge o be o se moreri.”

152 Ke rile, “Ke tsoma disoulo, Bert.” Gomme ke rile, “O na le yo motee yo a lahlegilego.” Le a bona?

153 Gomme o, “Aa, etla kgauswi le wenamong!” O rile, “Billy, o gabotse, eupša,” o rile, “o se ke wa bolela mohuta woo wa dilo go nna.” Kafao o tla—o tla thunya mabotlana ale, gomme—gomme seo se no ntira ke ikwele gampe kudu.

154 Bjale go lokile go bolaya lebotlana ge molao o bolela bjalo, bjale, bogolo goba bong, feela e ka ba eng molao o e bolelago. Ke be ke le mohlokomeledi wa diphoofolo lebaka la mengwaga ye mentši. Eupša lebelelang, Abraham o bolaile namane gomme a fepa Modimo, kafao ga go selo ka go bolaya lebotlana, ge molao o boletše. Eupša e sego go no a thunya, go no a tlogela a robetše kua, le go dira botswerere ka yona; yeo ke phošo, yeo ke phošo go e direng. Kafao ke nno bolela seo go lokafatša banešu ba ka ba go tsoma fa, le a bona, gore le tle le bone se ke lekago go se ra.

155 Bjale hlokomelang se, gore re hwetša gore monna yo . . . Letšatši le lengwe ke ile godimo kua, mosadimogatša le nna re be re le mmogo. Gomme—gomme o be a itiretše nakana ye nnyane yeo e letšago le go kwagala feela boka lesea le lennyane la lebotlana le lla, le a tseba, seletšo se sennyane sa go se tlwaelege ba se dirago. Gabotse, ge feela . . .

156 Ke be ke šoma, gomme ke be ke se ka fetša ka nako, ka kopanong, gomme ka ya godimo go tsoma le yena. Gomme go be go bile le go tsoma go gontši go kгатlampana, gomme lekga la mathomo mello ya sethunya, ka nageng yela, tšona moselamošhweu . . . Le—le naganne Houdini o be a le rabokgabo wa go phonyokga; o be a le magogorwane, go tšona. Gomme selo sa pele le a tseba, tšohle di tla utama. Gomme ge eba go ne seetša sa ngwedi, di tla fula bošego; goba go tsena ka tlase ga mkgobo wa matlakala goba se sengwe, gomme tša—tša se šuthe.

157 Ka gona re bona letšatši leo, ke rile, “Bert, ga o—ga o ye go šomiša nakana yela?”



158 O rile, “Aa, moreri, o pelo ya kgogo kudu!” O rile, “Etna kgauswi le wenamong.”

159 Gomme re thomile go ya ntle, gomme re beile disangwetši tsoko ka hampeng ya rena—ya rena. Gomme re be re tsoma . . . re be re eya go tsoma go fihla e ka ba ka sekgalela, godimo go dikologa merumo ya ntlhora ya—ya Presidential Range, gomme morago ra arogana le go bowa morago tlase. Ge re na le tshepe, re tseba mo e tla bego e lekeletše, re tla ya go e gogela ntle, ka letšatši goba a mabedi; ra e lekeletša godimo. Kafao go be go le e ka ba, oo, diintšhi tše nne tša lehlwa, goba tše tshela, se sengwe boka seo, e be e le nako ye botse ya go lota mohlala. Gomme re thomile go tloga, ra ya mmogo e ka ba, godimo ga thaba, go se mohlala, fao go be go se selo. Ngwedi o phadima bošego, le tshepe. . . [Ga go selo go theipi—Mor.]

160 Bert o be a le pele ga ka, a hlhla tsela, gomme kafao ke be ke sepela go bapa ka morago ga gagwe. Gomme o bile mokgwa wa go no dula fase, ka mokgwa woo. Lehlwa le be le omile. Gomme o thomile go obeletša morago, ke naganne o be a eya go ja sangwetše gomme re tla no arogana go tloga fao, gobane re be re le godimodimo ka thabeng nako yeo. Gomme o obeleditše morago *fa*.

161 Gomme ka thoma go tšea sangwetše ya ka, gomme ka thoma go hwetša lefelo go bea sethunya sa ka fase. Gomme—gomme ke thomile go hwetša sangwetše ya ka, gomme ke lebeletše go dikologa.

162 O tlišitše nakana ye nnyane ye ntle. Yeo, ke naganne, “Šaatena, bjoo ke boradia bja ditšhila go dira seo.” Kafao o tšere nakana ye nnyane ye, gomme a ntebelela, ka go wona mahlo a mokgaritswane, gomme a lebelela godimo go nna. O beile nakana yela ye nnyane ka molomong wa gagwe, ka mokgwa wola. Gomme ke rile, “Bert, o ka se dire selo boka seo, a o tla?”

163 O rile, “Oo,” gomme o butšweditše ka mokgwa woo. Gomme, go makaleng ga ka, e ka ba dijarata tše masometlhano go tloga go nna, feela go kgabaganya, tshepetshadi ye kgolo bogolo e emeletše. Bjale, tshepetshadi ke tshepe ya mme. Gomme e be e le fao, mahlo a yona a magolo a matsothwa, gomme tšona ditsebe di tlorotšwe. Le a bona, o kwele. Bjale, o be a le mme, le a bona, gomme lese a gagwe le be le lla. Gomme kafao ga go kgathale ge eba ka moka ga bona ba tšwetše ntle goba aowa, go be go le se sengwe ka go yena. O be a le mme.

164 Kafao Bert o lebeletše ka mokgwa woo, gomme a e budulela gape fase ka kgonthe. Gomme tshepe yela e sepeletše thwi ntle ka sebataolong. Bjale seo ga se sa tlwaelega, go se tlwaelege kudu, go sepelela ntle ka mokgwa woo. Gomme o be a lebeletše go dikologa, ka hlogo ye kgolo godimo, gomme mahlo a gagwe a lebeletše go dikologa.

165 Ka morago ga lebakana, ge motsomi a obeleditše gomme a tšea sethunya, o bone motsomi. Ka tlwaelo di tla no tshela, gomme di ile, le tseba ka fao go lego, ka bjako. Eupša, le a tseba, ga se a ke a šutha. O ile a no ema gomme a mo lebelela, ka bophara, o be a retolotše hlogo ya gagwe le go lebelela. Nna! Ka gopola, “Bert, o ka se kgone go dira seo.”

166 Le a bona, o be a sa itiriše go se sengwe. O be a se ka boikaketši. O be a sa dire. Yena, go tswaletšwe ka go yena, o be a le mme. Gomme lesea lela, ga ke kgathale ge go tšere bophelo bja gagwe, le be le le bothateng, o be a leka go hwetša lesea lela. Le be le le bothateng. O be a le, sekwitlahlo ka go yena, o be a le mme. Gomme o bone motsomi. Eupša monagano wa gagwe o be o se ka motsomi, o be o le ka lesea lela bothateng, lebotlana lela le lennyane.

167 Gomme kafao o gogetše polokego fase go masometharotshela ye. Oo, o be a ne maleba. O lekanyeditše raborolo yela fase. Ke—ke ile ka no swanela go retolla hlogo ya ka. Ga se ke kgone go e thibela. Ga—ga se ke kgone go mo lebelela. Ke naganne, “Feela metsotso e se mekae gape, gomme o tla šwalalanya pelo ya gagwe ya go botega; a leka go hwetša lesea la gagwe, le bothateng, a tseba motsomi yola o robetše thwi fale ka sethokgweng.” Gomme o be a tla šwalalanya pelo yela ya go botega thwi go kgabola, ka kolo yela ya lekgolo le masomeseswai a thoro ka fale. Gomme ke—ke. . . O be a ne maleba kudu. O lekanyeditše. Ke naganne, “Ke no se kgone go ema go e lebelela.” Ke retolotše mokokotlo wa ka.

Gomme—gomme ke—ke rile, “Morena, mo thuše, gore a ka se dire seo.”

168 Ke—ke ikwetše maswabi. Mme yola wa go šokiša a eme fale, a tsoma lesea la gagwe, gomme ke tsebile o be a sa itiriše seo. O be a le mme. A ka be a tšhabile, nako efe ye nngwe. A ka be a se a tsoga, gomme rena re feta. Eupša go be go le se sengwe ka go yena.

169 Gomme ke letile, gomme ke letile, gomme sethunya ga se sa tsoge sa rifuga. Gabotse, ke maketše, “Bothata ke eng?” Gomme ke letile, nako yeo ke retologile go dikologa ka go nanya ka kgonthe. Gomme ke bone tshepe e eme ntle fale, e sa mo lebeletše. Gomme ke lebeletše molongwana wa sethunya, o be o eya ka mokgwa wo. O nno. . . o be a leka go nepa, gomme o be a sa kgone go e dira.

170 O fošeditše sethunya fase mobung, gomme a lebelela go dikologa go nna, gomme wona mahlo a magolo a be a fetogile. Megokgo e be e kitima go theoga marama a gagwe. O ntshwere ka leoto la borokgo, o rile, “Billy, ntlhahlele go Jesu yola o bolelago ka yena.”

171 E be e le eng—e be e le eng? O bone se sengwe sa kgonthe. Le a bona? Mme tshepe yo monnyane yola o ile a swanela go pealatša

botshepegi, botshepegi bja kgonthe bjoo bo dirilego motsomi yo sehlogo yola fale . . . yola a bilego le pelo ye mpempe nkilego ka e bona. E be e se thero ye ke e rerilego. E be e le se a se bonego, se sengwe e bego e le sa kgonthe. Se be se se sa maitirišo. E be e se bofora. Yoo e be e le mme wa mmapale a nyaka lesea la gagwe, gomme seo se mo hlahletše go Kriste. Ke letikone ka kerekeng kua bjale, Mokriste wa go makatša, ka gore o bone se sengwe se se bego se se sa maitirišo. E be e se tumelo ya maitirišo. E be e le kgonthe.

<sup>172</sup> Oo, ngwanešu, kgaetšedi, ge kereke ye, ge batho ba, bošegong bjo, ge wena le nna! Go na le se sengwe sa kgonthe, e sego maitirišo. O ka no bona ba bangwe ba e bea godimo, eupša go na le selo sa mmapale. Go na le se sengwe ka go motho seo se mo dirago go phelela Modimo. Go na le Moya wo Mokgethwa wa mmapale bošegong bjo, ngwanešu, woo ga se maitirišo. Fale, ke selo sa mmapale.

<sup>173</sup> Gomme ke ba bakae ka fa ba ka ratago go ba Mokriste kudu, le go botega go Kriste, lehu, tlhomaro, e ka ba eng gape, o tla rata go ba Mokriste bontši bjalo ka tshepe yela e bile mme? A o ka rata, a o ka se rate go ba seo? Ke tla hlologela go ba Mokriste wa mohuta woo. Gore e bile boka mosadi yola yo monnyane wa Sirofenike bošegong bja go feta, o be a le mohuta wola wa Mokriste. Kgošigadi ye nnyane ye re bolelago ka yona bošegong bjo, e be e le mohuta wola wa Mokriste; ge a bone se sengwe seo e bego e le sa kgonthe, o be a le komana. Modimo re thuše, bošegong bjo, go amogela se sengwe sa kgonthe, Kriste.

A re inamišeng dihlogo tša rena feela nakwana, ge re rapela.

<sup>174</sup> Bjale ke a makala, ka moagong, bošegong bjo, ge eba go ne . . . ge eba go ne e ka ba ofe fa, ge le sa homotše ka kgonthe, ge go na le e ka ba mang mo a ka ratago, gomme a sa tsebe Kriste bjalo ka Mophološi wa gago wa sebele, gomme o rata go Mo tseba bjalo ka Mophološi wa gago, a o ka phagamišetša seatla sa gago godimo? Tee, pedi, tharo. Modimo a go šegofatše. Modimo a go šegofatše. Modimo a go šegofatše. Modimo a go šegofatše.

<sup>175</sup> Ke a makala ge eba go na le ba bangwe mo bošegong bjo, ba ba tleimago go ba Mokriste, mohlomongwe leloko la kereke ye kaone, ya sehlopha se segolo sa batho, eupša go le bjalo o tseba fase ka pelong ya gago gore ga o na le Bokriste ka pelong ya gago, bo tswaletšwe ka go yona. Go no swana le ge mme yola a be a le, tshepe, o tswaletšwe go ba mme; o be a le mme, go kgabola le go kgabola. Gomme o tla rata go ba Mokriste wa kgonthe, boka tshepe yela ye nnyane ya mme e bile mme; a o ka phagamiša seatla sa gago, wa re, “Nthapediše, Ngwanešu Branham”? Modimo a le šegofatše. Modimo a le šegofatše. Gohle go dikologa, godimo ka maphagamong, ke bona seatla sa gago.

176 Tate wa Legodimong, bonnyane ke be ke sa tsebe, ka letšatši lela la go tonya la Nofemere, ke eme fale, lehlwa gohle go theoga molala wa ka, ke kolobile, go bona monna yola a robetše fale, ka fao ke boletšego le yena, ke swere seatla sa gagwe, ke llile le yena, eupša ke mmoditše ka ga Beibele le se sengwe le se sengwe. Gomme o rile, “Oo, mohlomongwe o nepile.” Eupša go bona O swanetše go romela tikologong se sengwe sa kgonthe kudu, sela thwi ka tsela ya tlhago, gore—gore o—o nno se kgone go tlogela go bona gore go be go le se sengwe sa kgonthe. Gomme bjale ke mohlanka wa Gago, Morena.

177 Bjale go na le ba bantši mo bošegong bjo. Ba bangwe ba bona ba phagamišitše diatla tša bona, Tate, gore ga se nke ba ke ba ba Mokriste, gomme ba nyaka go ba bona. Modimo, nno se ba dumelele go ba yo mongwe wa ba, go no kitima le go tšoenane kereke, goba go tšea sebopego tsoko, goba thutotumelo, goba kolobetšo. Eupša a nke go tswalwe ka pelong ya bona, Kriste.

178 Gomme bao ba tšoenane kereke, bona, ba a nyaka, Morena, go swana le mohlomongwe mo—mo mosadi yo monnyane, kgošigadi ye nnyane re bego re bolela ka yona. O—o be a swerwe ke tlala bakeng sa se sengwe. Gomme—gomme ba a dira, le bona, Morena. Gomme ge a bone se sengwe seo e bego e le sa kgonthe, seo se tsebagaditšego Modimo ka go batho, o be a le komana nako yeo. Gomme o rile, “A go šegofatšwe Morena Modimo wa Israele!” O be a sa nyake go dira gape ka diboepogo tša bohetene.

179 Gomme, Tate, ba bantši mo bošegong bjo, ga go pelaelo, ba ka go seemo sela sa go swana. Ge ba ka no bona se sengwe sa kgonthe! Gomme O re boditše ge O be o le mo ka lefaseng, seo se tla diregago ka letšatšing le. Re a botšwa gore O a swana maabane, lehono, le go ya go ile. Gomme re tseba ka fao O tsebagaditšwego, le ka fao Bafarisei ba paletšwego ke go e bona. Morena, dihlopha tša go swana lehono di šitwa go e bona, ka go ba wa kereke, go tšoenane, go ba le diboepogo tše di itšego tša dithutotumelo, le go ya pele. Bona, ba šitwa go bona Mesia, Moya wo Mokgethwa wo mogolo o itsebagatša ka Yenamong le batho, bjalo ka ge O tshepišitše gore O tla dira.

180 Efa, bošegong bjo, Morena, gore yo mongwe le yo mongwe wa ba o tla lemoga gomme o tla bona Bogona bja Gago. Gomme a nke e tle ka pelong ya bona, temanathero, “Yo mogolwane go feta Salomo o fa bošegong bjo,” yoo ke Jesu Kriste, Morwa wa Modimo yo a tsogilego, a loketše go tla le go fetola, le go dira dipelo tše mpsha, le go bea ka go bona boitemogelo bja go tswalwa bja Modimo. Go no swana le mme tshepetshadi yola, se sengwe a bego a se na le selo go dira le sona, ka mogau wa Modimo o be a kgethilwe go ba tshepe, o be a kgethilwe go ba mme, le mme wa go botega. Gomme O re boditše re “kgethilwe pele ga motheo wa lefase.”

181 Ke a rapela, Modimo, gore O tla dumelela yo mongwe le yo

mongwe wa bao ba nago le go goga gola ka pelong ya bona, boka mohumagadi yo monnyane a dirile, go hwetša Modimo, gore bošegong bjo go tla ba se sengwe sa kgonthe se diregago, gore ba tla bona, le go Mo hlankela. “Ka gore yo mogolwane go feta Salomo o mo.” Re kgopela Leineng la Jesu. Amene.

<sup>182</sup> Bjale ka tlhomphekogolo, ka setu, feela pele re etla aletareng. Hle, go se sepele motho tikologong. E nong go ba tlhomphekogolo ka kgonthe nakwana. Ye ke iri ya go ikgetha, nakwana ya go ikgetha. Diphetho di a dirwa. Ba bantši ba phagamišitše diatla tša bona. Ke a dumela o be o hlokofetše ka go teba ka go seo, ge o boletše seo.

<sup>183</sup> Bjale, le kwele ka ga Beibele, le kwele ka ga Jesu, le kwele O be a le Morwa ya Modimo. Le rutilwe gore O tsogile gape, gomme le rutilwe gore O a swana maabane, le hono, le go ya go ile.

<sup>184</sup> Bjale a Moya wo Mokgethwa wo re bolelago ka wona, a ke Jesu Kriste? Nnete, Ke yona. Le a bona, Yena ke Modimo; go tsebja bjalo ka Modimo, Moya wo Mokgethwa. Ga se Modimo yo mongwe; ke Modimo wa go swana. Tate, Morwa, le Moya wo Mokgethwa, ga se Bomodimo ba bararo; ke ditholanakgopolo tše tharo tša Modimo wa go swana, le a bona, feela Modimo wa go swana ka dibopego tše tharo. Le a bona, ka mokgwa wo mongwe, diofisi tše tharo, boka, le a tseba; ge A diretše bjalo ka Tate, gomme morago bjalo ka Morwa. Ke Modimo a theoga, go tšwa go Yena Yo a sa kgonego go kgwathwa (ebile le go kgwatha thaba, o be a swanela go hwa), go fihla re kgonne go Mo swara nameng.

<sup>185</sup> Gomme bjale O ka go wena. O go hlwekišitše ka Madi a Gagwe, gore A ke a phele ka go wena. “Ka letšatši leo, le tla tseba Ke ka go Tate, Tate ka go Nna; Nna ka go lena, gomme lena ka go Nna.” Le a bona? Ke Modimo ka godimo ga rena, Modimo o na le rena, Modimo ka go rena. Le a bona?

<sup>186</sup> Gomme yoo ke Kriste, bošegong bjo, Moya wo Mokgethwa. O a swana. Gomme lena le . . . Yena ke morara, gomme lena le makala. Ebang le tumelo ka go Yena. Gomme ge A ka itsebagatša Yenamong, bošegong bjo, a le magareng ga rena!

<sup>187</sup> Bjale ge a eme fa ka mabadi, yoo e tla ba motho, yoo ke nama. Yo mongwe le yo mongwe a ka kgona go ekiša seo; motho a ka kgona go iphetola ka boyena. Goba, mohlomongwe, ga re tsebe se Jesu a bogegilego boka sona, re no ba le kgo—kgo—kgo kgopolo ya motaki, saekolotši ya yona, se A bogegilego boka sona; Hofmann o bile le mohuta o tee, Sallman o mongwe, le bontši bjo bokae gape!

Eupša o tla Mo tseba bjang? E tla ba ka Bophelo bja Gagwe.

<sup>188</sup> Gobane, ge monna a eme fa ka mengwapo ya meetlwa ka seatleng sa gagwe, le e ka ba eng gape, yoo e tla ba moitiriši; gobane, ge Jesu Yenamong a etla, leihlo le lengwe le le lengwe le tla Mmona, letolo le lengwe le le lengwe le tla kobega, gomme leleme le lengwe le le lengwe le tla e paka. Ka kgonthe.

<sup>189</sup> Eupša Moya wa Gagwe o fa, le a bona. Gomme ge re ka no dumelela menagano ya rena beng go fapogela ka go wa Gagwe. “A nke monagano wo o bego o le ka go Kriste o be ka go lena.” Yena ke Lentšu, gomme Beibele e rile, “Lentšu la Modimo.” Yeo, ke ba bakae ba tsebago gore Jesu o be a le Lentšu? Ka Beibeleng, Baheberere 4, gomme Beibele e rile, “Le bogale go feta tšhoša ya magalemabedi, le Mohlathi wa dikgopolo tša pelo.” Bjale, seo ke se se bego se le ka go Salomo, (Lentšu, Modimo) lebaka a kgonneggo go hlatha kgopolo ya bona. Seo se be se le ka go Jesu, le a bona. Seo ke se se lego mo bjale, Selo sa go swana.

<sup>190</sup> Bjale lena ntle kua. Ga ke ye go bitša mothalo wa thapelo, gobane ke ya go dira pitšo ya aletara. Go ka no ba ba bangwe mo ba sego ba ke ba tsoge ba ba ka go e tee ya dikopano. Ga ke bone motho ka moagong, yo ke—yo ke mo tsebago.

<sup>191</sup> Yo mongwe o be a mpotša gore e be e ka ba masometharo bošego bja go feta, goba bokaonana, e bidityšwego. A le a lemoga gore nako ye nngwe mosadi o kgwathile kobo ya Gagwe, gomme O retologile go dikologa, gomme selo sa go swana se diregile, gomme—gomme maatla a tšwile go Yena, Yena Morwa wa Modimo? Eupša O rile, “Ye megolwane go feta ye le tla e dira, gobane Ke ya go Tate.”

<sup>192</sup> Bjale le no dumela le go ba le tumelo, yo mongwe le yo mongwe wa lena, gohle go dikologa fa, ka go dikhote tše, maako, kae kapa kae o lego. Dumela! O se ke wa nagana gore o hloka kholofelo.

<sup>193</sup> Bjale ge nka kgona go go fodiša, ke tla e dira, eupša nka se kgone go go fodiša. Nka bea diatla godimo ga lena, gomme ke ikemišeditše go dira seo, go yo mongwe le yo mongwe a nago le tšona dikarata. Gomme ba fa dikarata letšatši le lengwe le le lengwe. Kafao ke ikemišeditše go dira seo, eupša seo ke, seo, seo e no ba go laetša gore ke dumela le wena.

<sup>194</sup> Eupša, lebelelang, gobaneng le sa no Mo kgwatha? Beibele e rile, “Yena ke Mopriska yo Mogolo,” gonabjale, “yoo a kgonago go kgwathwa ke maikutlo a mabofokodi a rena.” A yeo ke nnete? Gabotse, ge A le Mopriska yo Mogolo, gona ka kgonthe O tla dira ka tsela ya go swana A dirilego nako yela. A A ka se ke? Ka nnete O tla dira ka tsela ya go swana A dirilego nako yela. Go lokile, bjale o Mo kgwatha ka tumelo.

<sup>195</sup> Bjale, Tate wa Legodimong, kopano ke ya Gago. Eupša ke rutile bošegong bjo ka mosadi yo monnyane yo go bona se sengwe sa kgonthe, ge a bone moya wola wa go hlatha godimo ga Salomo. Gomme re na le nnete, Morena, gore Mantšu a Gago ke therešo. O rile seo se tla bowa gape, boka go bile ka matšatšing a Sodoma, feela pele ga go Tla; gomme O be o swana maabane, lehono, le go ya go ile. Mediro ye O e dirilego, re tla e dira le rena. Gomme O Mopriska yo Mogolo, bošegong bjo, yo a kgonago go kgwathwa ke dikwi tša mefokolo ya rena. Ke bontši gakaakang re bo hlokago?

196 Bajuda bale ba be ba hloka bontši gakaakang, go bona gore O be a le Moprofeta? Kgarebe e imile, le dilo tšohle tše, eupša, bona, dithutotumelo tša bona di ba fougaditše.

197 Morena, go na le ba bangwe mo ba tla go swana, mohlomongwe e sego go tšwa Seba, eupša ba tšwa mafelong a mantši. Ke a rapela, Modimo, gore O tla itsebagatša Wenamong bošegong bjo, kgontho. Gomme ka gona itsebagatše Wenamong ka go bona, bjale ka sekwitlhahlo sa mme yola ka go tshepe ye nnyane yela e dirile letšatši lela. Ke rena ba Gago, Tate. Bolela ka rena, Leineng la Jesu. Amene.

198 Bjale ke nyaka le be le tumelo le go dumela, yo mongwe le yo mongwe wa lena, gohle go dikologa mogohle. Gomme e nong go rapela. Bjale le se ke. . . E nong go lebelela gomme le rapele bjale, gomme le no dumela. Le a bona, wo o ka no se ke, Moya wo Mokgethwa o ka no se thabe ka go dira se. Ge A sa dire, ke tla bitša mothalo wa thapelo. Eupša e nong go ema mo. Yo mongwe ntle kua, le ge o. . . Ga ke go nyake ka dikarata tša thapelo. E no—e no ba mang a no—a no rapela. Nnete, nka se tsebe, eupša o no rapela le go bona. E no re, “Morena Jesu, ke a tseba monna yola ga a ntsebe. Ga a tsebe selo ka nna, eupša ke a tseba gore ke a dumela.”

199 Tumelo ya gago e idibetše. O se ke wa gatelela bjale, goba wa taboga. O taboga go tloga go yona. E thwi le wena. E no ikhutšiša wenamong gomme o dumele. E no dumela bjale, eba le tumelo. [Ngwanešu o a profeta—Mor.] Amene. Gomme ebang tlhomphokgolo, nno bang le tumelo, nno dumelang. Dinako tše dingwe tumelo ya gago e idibetše, o na le yona gomme ga o e tsebe. Mosadi yo monnyane yola o bile le yona; o be a sa e tsebe.

200 Ke ba bakae ba lena ba kilego ba bona seswantšho sa Morongwa yola wa Morena, Seetša sela? Ke, se tšerwe thwi mo ka Texas. Se tšerwe, gohlele lefaseng bjale.

201 Eupša o nagana eng, mohlomphegi? A o a dumela, o dutše thwi mo khoneng? Go be go lebega o ka re o be o lebeletše ka tetelo kudu. O na le dilo tše ntši tša go fošagala ka wena. O na le ditlhakahlakano, dilo tše ntši. Bjale ge ke boletše seo, maikutlo a go se tlwaeleke ka kgontho a tla go wena, a ga se a dira? Ge yeo e le nnete, phagamiša seatla sa gago. Bjale ke nna mosetsebe wa go felela go wena, ga ke go tsebe. Yeo ke nnete. O a tseba ke eng? Seetša sela se nno dula thwi fase godimo ga gago. O a bona? Seo ke se o se kwelego, mohuta wa maikutlo a mabose ka kgontho. Ke be ke Se šeditše, o a bona, se etla thwi tlase.

202 Bjale, ee, o mo, o nyaka go rapelelwa pele o tlogela moago. Ge Modimo a ka nkutollela seo bothata bja gago e lego, gomme wena o dutše fale, le nna fa, a o tla e dumela go ba Modimo? Ke go tsupuga ga setho, ye nngwe ya dilo tša gago tše kgolo. Yeo ke nnete. A yeo ke nnete? Ge Modimo a ka mpotša gore o mang, leina la gago ke mang, o na le kgomano ye botse le Yena bjale,

a o tla ntumela go ba moprofeta wa Gagwe, goba mohlanka wa Gagwe? Ntshwareleng, seo ke kotanašitiši go bontši, le a bona. A o a e dumela? Leina la gago ke Mna. Sturgeon. Ge yeo e le nnete, phagamiša seatla sa gago. E dumele, gomme o fole.

203 Mohumagadi yo monnyane šo o dutše thwi morago kua, hlogo ye ntsho, thwi ntle mo ka mokgobeng. Ee, wena. O ile wa makala ge seo se boletšwe. Bjale thwi ka nako ye o thoma go ikwela mohuta wa go se tlwaelege, o a bona, se sengwe sa go swana le se sebose ka kgonthe go go dikologa. Ge e ka ba mang a ka lebelela, ge o ka kgona go Se bona, mohuta wa Seetša sa go lebega botalaserolwana se etla fase godimo ga mohumagadi yo monnyane. Bjale se bothata bja gagwe e lego, o na le go opa ga hlogo goo go mo tshwenyago gampe ka kgonthe. Yeo ke nnete. Ge seo e le nnete, emišetša seatla sa gago godimo ka mokgwa woo. Gomme ga se ka ke ka mmona, ka bophelong bja ka. Yeo ke therešo. Yeo ke nnete. Go opa ga hlogo go a mo tshwenya, boka hlogošoro, eupša di ya go go tlogela. Amene. E dumele. Bjale. . .

204 Go na le monna o dutše thwi kgauswi le wena fale, gomme o lebeletše thwi go nna ka tiišetšo kudu, gomme Seetša sela se sepelela thwi godimo go leba go yena. Gomme monna o tlaišega bothata ka mahlo a gagwe. Eupša ge a ka dumela, Modimo o tla fodiša mahlo le go a dira a fole. O a dumela? Go lokile. Ga se ka ke ka go bona ka bophelong bja ka. O mosetsebje go nna.

205 E re, moisa yola yo moswa a dutšego thwi kgauswi le wena fale, le yena, o tlaišega ka bothata ka hlogo ya gagwe. Yeo ke nnete. Yeo ke nnete. Ga se nke ka ke ka bona monna, bophelong bja ka. Modimo o tseba seo, le a bona. Go lokile, o a dumela.

206 Monna a dutšego thwi kgauswi le wena, a rwele go digalase, a lebeletše ka tsela ye. Ee, o rwele digalase, eupša bjoo ka kgonthe ga se bothata bja gago. O na le se sengwe sa phošo ka mokokotlo wa gago, se o nyakago go rapelelwa sona. Ge seo e le nnete, šišinya seatla sa gago. Go lokile.

207 Moisa yo moswa yola a dutšego thwi kgauswi le wena fao, thwi kgauswi le wena. O bile le mathata a mantši, lesogana lela le nao. Ee, mohlomphegi, o aperego thai ye khubedu, o bile le mathata a mantši ka lapeng la gago le dilo. Mohuta wa, mosadimogatša wa gago ke mohuta wa motho wa go tšhoga, gomme o tlaišega ka mohuta tsoko wa kgatelelo ka hlogong ya gago, le wena. Seo ke O RIALO MORENA. Yeo ke therešo. Yeo ke nnete. O no dumela. O se belaele, eupša o dumele.

208 Mosadi šo o dutše thwi morago mo. A ga le bone Seetša sela se sepelela morago kua, le go dula fase thwi mo? O tlaišega ka bothata bja leihlo, le sebudula sa gagwe. Oo, o ya go E foša. Morena Modimo, nthuše. Leina la gagwe ke Mdi. Chambers. Dumela ka pelo ya gago yohle, Mdi. Chambers. Emelela ka maoto a gago. Emelela, gore batho ba bone o mang. Ke nna mosetsebje,



ga se ka ke ka mmona ka bophelong bja ka. Ya. Go fedile bjale. Jesu Kriste o go dira o fole.

<sup>209</sup> Bjale ge yoo e se Jesu Kriste, wa go swana maabane, lehono, le go ya go ile, O kae? A O tshepišitše go e dira? Bohle ba ba e dumelago, phagamišetša seatla sa gago godimo. Go lokile.

<sup>210</sup> A o nyaka go ba Mokriste wa kgonthe, wena yo a phagamišitšego seatla sa gago lebakana la go feta; boka tshepe yela ya mme ya kgale e bile? Ge Moya wo Mokgethwa o sa le fa, gomme tlotšo e le gohlegohle go rena, gobaneng o sa no dira tsela ya gago, le go tla go ema thwi mo aletareng, motsotso feela. Ge o nyaka Modimo bakeng sa phološo, a o tla tla fa, gomme e nong go tla mo aletareng ye le go ema mo le nna motsotso feela? Emelela. Yeo ke yona. Yeo ke nnete. Modimo a go šegofatše. E ka ba mang ka moagong, e ka ba kae o lego, a o tla tla? Yeo ke nnete. E tla thwi bjale, wena yo a nyakago go hwetša Kriste.

<sup>211</sup> O ka se tsoge wa ba kgauswana le Yena go fihla o kopana le Yena. O mo. O a tsebagatšwa, se sengwe sa kgonthe. O tšoenne kereke, bontši bja lena maloko a kereke bjale, le tšoenne kereke eupša seo ke sohle le bilego le sona, o nyaka go bona se sengwe sa kgonthe. Ge seo e se tlwa se Jesu Kriste a itsebagaditšego Yenamong go ba!

<sup>212</sup> Lebelelang ngwana yo monnyane yo a tlogo mo, a lla, megokgo e kitima go theoga sefahlego sa gagwe se sennyane. Ga go makatše, ke ba boleta. Ga se ba gogwa go kgabola se sengwe le se sengwe. Yo mongwe a etla go theoga mkgoba, yo mongwe ka morago, a etlang tlase, bana ba bannyane, ge ba bagolo ba fetile tša bona kgauswi. A o ka se tle? E tla thwi godimo mo bjale gomme o eme go dikologa aletara. Lena maloko a kereke, lena batho ba le nyakago go ba le boitemogelo bja Kriste ka pelong ya lena, a le ka se tle mo? Ge A tseba pelo ya gago, gomme o a tseba o ka se kgone go e uta, a o ka se tle thwi bjale le go ema mo, feela pele re eya pejana. E tla mo, ema mo bakeng sa lentšu la thapelo. A o tla e dira?

<sup>213</sup> E tla, laetša, Mo emela. O a Mo emela. Ge o lewa ke dihlong ka Yena bjale, O tla go jelwa ke dihlong kua.

<sup>214</sup> Elelwang, O mo. Lengwalo le rile se se tla direga, gomme mo O itsebagatša Yenamong bjalo ka go ba mo. Ge o le moleloko wa kereke, gomme o sa tsebe Kriste bjalo ka boitemogelo bja kgonthe, a o ka se tle mo nakong ye? Bjale, ga ke kudu go phegelela batho. Selo se nnoši nka kgonago go se bolela, ke go le botša Therešo, gomme ge Bogona bja Kriste, hlakanya le Lentšu la Gagwe le dirwa go bonagala.

<sup>215</sup> Godimo ka bophagamong, lena ba le phagamišitšego diatla tša lena; kgaetšedi, ngwanešu, ge o nyaka go tla tlase, re ya go leta thwi fa. E tlang thwi pele go theoga, gomme le kgobokane go dikologa aletara, feela bakeng sa lentšu la thapelo. A nke lefase le tsebe, a nke Jesu a tsebe gore le seo ga le lewe ke dihlong, le

nyaka go ba Mokriste wa nnete. A o ka se tle, ge re sa no leta nakwana goba tše pedi?

<sup>216</sup> Leloko la kereke, bolelo, mokgelogi, a o ka se tle wa ema mmogo le bona bjale? Etle mo gomme o eme mmogo, wena yo a sa dirago, ge o se na le boitemogelo le Modimo, gore o tswetšwe ka Mmušong wa Modimo, ka mokgwa woo.

<sup>217</sup> Ke eng bontši o nyakago go e bona? Elelwa, ke go botša Leineng la Morena, ge o ntšea go ba mohlanka wa Gagwe, le ke leswao la mafelelo leo kereke e tla le bonago, go ya ka Lengwalo. Seo e bile selo sa mafelelo se Abraham a se bonego se dirwa pele morwa wa tshepišo a fihla. Gomme re Peu ya bogoši ya Abraham, gomme Jesu o tshepišitše Peu ya bogoši go bona selo sa go swana seo Abraham a se bonego, feela pele lefase la Bantle le tšhungwa. Le se diegiše bakeng sa se sengwe gape. Sathane o leka go go dira o lebelele mošola. Etle bjale, ge:

Go na le Mothopo o tladitšwe ka Madi,  
A ntšhitšwe go tšwa ditšhikeng tša Imanuele,  
Moo badiradibe ba phonkgetšego ka tlase ga  
lefula,  
Ba lahlegelwa ke patso yohle ya molato wa  
bona.

Lehodu le le hwago le thakgetše go bona  
Mothopo woo ka letšatšing la gagwe;  
Fao a nke le nna, le ge ke le mobe bjalo ka yena,  
Ke hlatswe go tloša dibe tšohle tša ka.

<sup>218</sup> A o ka se tle gomme wa e amogela bjale? Ke letile feela nakwana, yo mongwe gape a ka tla le go ema fa bakeng sa thapelo.

<sup>219</sup> Bjale ke ya go kgopela badiredi fa, baena, etlang tlase gomme le eme le nna, go dikologa, ge re rapela; le badiredi ntle kua, ba ba amegago, le ba bangwe ba batho ba ka boagišaneng bja gago, bao ba tla tlogo kerekeng ya gago goba—goba se sengwe, gore o na le kgahlego ka go—ka go disoulo di etla go Kriste, gomme o dumela se go ba Jesu Kriste.

<sup>220</sup> Bjale, elelwang, ga se nna Jesu Kriste. Ke nna ngwanabolena, modiradibe yo a phološitšwego ka mogau. Ke bjalo ka ge le le. Eupša ke Jesu Kriste, Moya wo Mokgethwa wo o lego mo le rena, o boloka Lentšu la Gagwe. Ga A swanela go dira se, eupša O tshepišitše O tla se dira. Jesu o be a se a swanela go fodiša balwetši, eupša Beibele e rile, “O e dirile, gore go phethagale se se tshepišitšwego ka Yena.”

<sup>221</sup> Bjale, ga re kgathale ke mohuta ofe wa kereke o lego wa yona; ge o dumela gore Jesu Kriste o gona, o a dumela gore go na le boitemogelo bja go tswalwa gape, bja kolobetšo ya Moya wo Mokgethwa.


<sup>222</sup> Badiredi, sepelelang thwi godimo, magareng ga batho ba fa. Etlang thwi godimo magareng ga bona, beang diatla tša lena go bona. Re ya go neela thapelo bakeng sa bona. Ke kgopela phuthego ya rena go no ba tlhomphekogolo ka mo le kgonago dinakwana di se kae. Re tseba bjang se Moya wo Mokgethwa o tla se dirago! Yeo ke yona, sepelela thwi ka gare, o itlhakanye wenamong thwi le batho. Etlh thwi go ba dikologa, yo mongwe le yo mongwe.

<sup>223</sup> Bjale elelwang, go ne selo se tee o ka kgonago go se dira, ke go amogela se A go tshepišitšego. A le bone kgonthe ya tso go ya Kriste?

<sup>224</sup> Bjale ke ya go kgopela phuthego ge ba ka ema feela motsotso, ka tlhomphekogolo le ditlhomphe go bona. Yo mongwe le yo mongwe wa lena dumela bjale. Ipolele tšohle tše o di dirilego, seo ke sohle o ka kgonago go se dira, gomme morago kgopela Modimo go go lebalela. Gomme Le amogele, Le dumele. Bjale a nke yo mongwe le yo mongwe a rapele ka tsela ya gago mong.

<sup>225</sup> Tate wa rena wa Legodimong, re tla go Wena, ka disoulo tše di itsholago. Ka fao kanegelo ye nnyane, ka ga tshepe yela ya mme, e tantšwe botebong, gore batho ba nyakile go dira se sengwe, goba go bona se sengwe sa kgonthe; boka kgošigadi ya Borwa, yo a tšwago dikarolong tša kgolekgole tša lefase, go kwa bohlale bja Salomo. Gomme yo mogolwane go feta Salomo o mo, Mophološi wa motho, Jesu Kriste wa Nasaretha! Ba phološe, Tate. Le balela dibe tša bona. Hlatswa disoulo tša bona ka Mading a Kwana, gomme o ba fe boitemogelo bja go tswalwa o le Mokriste. Ga go phoofolo ye nngwe, ga go selo gape, se ka bego se dirile seo, eupša mme tshepe. Seo ke se a bego a le sona. Re fe boitemogelo bjoo, Morena, bjale, bja boitemogelo bja go tswalwa gape, ka Mmušong wa Modimo, ge Moya wo Mokgethwa o sa le fao. E fe, Morena. E fe, Morena.

<sup>226</sup> Bjale tswalela mahlo a gago, phagamišetša diatla tša gago godimo, gomme o re, dira boipolelo bja gago, o re, “Jesu, bjale ke a dumela. Ntšee ka mo ke lego. Ga go sa na nka kgonago go se dira. Fodiša mmele wa ka wa go babja. Ntšee, Morena. Ke a dumela O mo, Moya wo Mokgethwa o mo o itsebiša ka Bowona. Mphološe ka mogau wa Gago, Morena. Ke sohle ke tsebago mkgwa wa go se dira. Ka Leina la Jesu Kriste!”

Ngwanešu Grant, a o ka re etapele ka thapelo? 

64-0306 Yo Mogolwane Go Salomo O Mo Bjale  
Soul's Harbor Temple  
Dallas, Texas U.S.A.

NORTH SOTHO

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)